

Carta n-tunda'a Spalu nuu ñayiu Roma

*N-ndajan tnu'u Spalu ñayiu ka kukanu ini Jesu-
cristu xndaxio Roma*

¹ Daña Spalu, se xinokuechi nuu Cristu Jesús, n-kaxi ña'a Taa-ro Ianyuux xa dakua'a-da ñayiu, te n-tunda'a ña'a-ia xa kada-da xijan. N-kaxí ña'a-ia xa ja'an-da nuu ñayiu nax io xa kada-i xa nanita'u-i. Tnu'u va'a kuu. ² Xa daa nga n-ja'an Ianyuux nuu se n-ka xo ja'an tnu'u-ia nuu ñayiu xa'a. Xa daa nga n-xia'an-ia tnu'u-ia-s xa kada-ia ñin xa kada-ia xa na kua'a nanita'u ñayiu. N-ka chidotnuni-s xijan. Ii tutu xyodotnuni xa n-ja'an-ia. ³ N-kakune'e-ia nax kada Da'ya Yii-ia. Ñayiu n-kuu Da'ya Yii-ia, te kuu-ia da'ya dana David. ⁴ N-nadandoto Espíritu Ianyuux-ia na n-xi'í-ia. Ii Espíritu Ianyuux. N-nandoto Jesu-cristu, te n-ka xini ña'a ñayiu, te diuni n-ka xini-i xa kuu-ia Da'ya Yii Ianyuux. Xto'o-ro kuu Jesucristu, te taxnuni-ia. ⁵ N-kaxi ña'a Jesucristu xa kada-da tniu-ia. Mee-ia n-tunda'a ña'a ntdaa-da xa dakua'a koio-da ñayiu ntdaa nación io ñuñayiu xa na kua'a na kukanu ini koio-i-ia, te jandixa-i-ia. ⁶ Tna'a ñayiu n-kida Ianyuux xa tekui tnu'u-ia xa na kua'a nanita'u-i ka kuu-n. ⁷ Tunda'a-da carta ya'a juan xee nuu ntdaa ndixi xa ka kuu-n ñayiu xemani ña'a Ianyuux xndaxio Roma. N-ja'an-ia xa nduu koio-n ñayiu ii, te daa n-kida-ia. Xijan ta'u-da nuu Ianyuux xi'in nuu Cristu Jesús, Ia kuu Xto'o-ro,

xa na chindee chituu ña'a-ia. Diuni xijan ta'u-da nuu-ia xa na ku kundaa ku kuvatu anu koio-n chi n-ka natu ini-n xa n-ka kida-n kuechi.

Kuu anu Spalu xa nkotoni'ni-s ñayiu ka kukanu ini Jesucristu xndaxio Roma

⁸ Ki'na ka na ja'an-da nuu-n xa xko xia'an-da nuu Taa-ro Ianyuux xa n-kuta'u-da chi n-kida-ia xa ka kukanu ini-n Jesucristu. Diuni xko xia'an-da nuu-ia xa kuvete-da xa ka tekú ñayiu ntdaa ñuu io ñuñayiu vaxi xa ka kukanu ini-n Jesucristu. Xaxe'e xa n-xi'í Jesucristu, chinuu Ianyuux xa xijan ta'u-da. ⁹ Na'a Ianyuux xa xko kakune'e ña'a-da hora xko xijan ta'u-da nuu-ia ndikiu ndiñuu. Tniu-da kuu xa dakua'a-da ñayiu. Du'a xinokuechi-da nuu-ia. Xko ja'an-da nuu-i xa io xa kukanu ini-i Da'ya Y#-ia. Vichi nde'e xinokuechi-da nuu-ia.

¹⁰ Ndikiu ndiñuu xijan ta'u-da nuu-ia te xijan tnu'u-da-ia nu ma kachi-ia xa xee-da dian. ¹¹ Yo kuu anu-da xa xe kotoni'ni ña'a-da na kua'a na kachitnu'u ña'a va'a-da nax kuu xa n-ja'an Ianyuux xi'in Jesucristu na kua'a va'a ka na kutnuni ini koio-n xa n-ka ja'an-ia, te va'a ka kukanu ini koio-n Jesucristu. ¹² Na tekú-n xa va'a ka kukanu ini-da-ia, dani ndixi va'a ka kukanu ini koio-n-ia. Diuni va'a ka kukanu ini-da-ia hora na tekú-da xa ka kukanu ini ka-n-ia tuku. ¹³ Kachitnu'u ña'a-da ndixi xa kuu-n ñayiu ka kukanu ini Jesucristu xa kue'e vuelta n-xantuu-da kiu xa xee-da dian, ko daa nga ñatu n-kuu xa xee-da. Xa dakua'a ña'a-da kuu-da xa xee-da xa na kua'a na jandixa koio-n Jesucristu. Dava ñayiu ñatu ka kuu da'ya dana Israel xndaxio dava ka ñuu ka jandixa Ianyuux

xaxe'e xa n-dakua'a-da-i. Ná ka jandixa ñayiu ijan Ianyuux, io xa jandixa koio-n-ia. ¹⁴⁻¹⁵ Kidayika-i xa juña tnu'u ka-da dava ka ñayiu Grecia xi'in dava ka ñayiu ka kuu yatnu'u ñayiu Grecia xi'in ñayiu ñatu ka kuu yatnu'u-i nax io xa kada-i xa nanita'u-i. Kidayika-i xa kachitnu'u ña'a-da ndixi nax io xa kada-n xa nanita'u-n tuku. Nani xian tnu'u-da ñayiu kaxi ini, dani xian tnu'u-da ñayiu ka kukee xi'in xaxtnuni-i.

¹⁶ Ñatu kujanuu-da xa xian tnu'u-da ñayiu nax io xa kada-i xa nanita'u-i. Hora ka tekui xijan, ka kukanu ini-i Jesucristu te ka nanita'u-i. Dava'a nga ñayiu kukanu ini-ia nanita'u. Ki'na nuu ñayiu Israel n-ka kukanu ini-ia. Ijan dada ndijun nga n-ka kukanu ini ña'a ñayiu ñatu ka kuu ñayiu Israel. ¹⁷ Xia'an-da nuu ñayiu xa na kukanu ini koio-i Jesucristu na kua'a maxku kundido kutau ka-i kuechi n-ka kida-i. Ñayiu n-ka kixe'e xa kukanu ini-i-ia, kukanu ini ka-i-ia jua'an. Ná ja'an-da ya n-ja'an Ianyuux, te yodotnuni. Du'a yodotnuni: “Ña tuu ka na kuechi xndido xtau ñayiu n-ka kukanu ini-ia, te xaxe'e xijan kutuu koio-i andiu nikava nikuita.”

Yo kiti ini Ianyuux nuu ñayiu ka kida kuechi

¹⁸ Kue'e xa kida Ianyuux xa na kutnuni ini ñayiu xa kiti ini-ia nuu ntakaa ñayiu ña ka chinuu-ia te ka kida-i xaloko xadu'a. Xaloko ka kida-i jan kida xa ñatuka xini dava ka ñayiu ndeda xa kuu xandaa, te ni mee-i ñatuka xini ndeda kuu xandaa tuku. ¹⁹ Ntdaa ñayiu ñuñayiu xna'a xa io Ianyuux chi xnde'a-i xa n-kidava'a-ia, te ka tutnuni ini-i janda kuu-ia. ²⁰ Ka tutnuni ini-i janda kuu Ianyuux juini ña xini-i janda kaa-ia xaxe'e xa ñatu kanda nde'a-i-ia. Ka kutnuni ini-i janda kuu-ia chi

nde na n-xe kavatuu ñuñayiu xi'in nde vitna io xa n-kidava'a-ia, te xnde'a-i. Xna'a-i xa mee-ia n-kidava'a ntdantu'u xa io. Xa daa nga kua'a-ia kadava'a-ia xa n-kidava'a-ia, te dani kua'a-ia xa kani ini-ia ñn xa juini-ia xa koo. Diuni ka xini-i xa nikava nikuíta kutuu-ia. Xijan kuu xa maxku yoo-i ku ja'an xa ñayo-i xini janda kuu Ianyuux ndixa. ²¹ Juini ka xini-i xa io Ianyuux, ko ña ka ndadaka'nu-i-ia, ni ñatu ka ja'an-i xa mee-ia kuu Ianyuux ndixa. Ni ñayo-i xia'an nuu-ia: “Na kuta'u-da, Taa-ro.” Ñatu ka chinuu-i xa io-ia, ni ñatu ka juini-i kada-i xa juini-ia xa kada koio-i. Mee ni xaloko xadu'a xñu'u anu-i. Ka kuu-i ná ka kuu ñayiu xtuu nee xtuu du'a. Kuenda kiu nuu nee xtuu-i xa ñatu ka kida-i xava'a. ²² Ka ja'an-i xa ka tu'a va'a-i, ko unu lilu-i. ²³ Ñatu ka ndadaka'nu-i Ianyuux ndixa, chi daa xa n-ka kidava'a mee-i ka ndadaka'nu-i. Ka ndadaka'nu-i xa xndaa ná xndaa ñayiu, xa xndaa ná xndaa kiti ka ndava xi'in xa xndaa ná xndaa kiti koon nda'a xi'in xa xndaa ná xndaa koo. Ntdaa xa'a ka naa, ko Ianyuux makiu mañuu naa-ia.

²⁴ Xaxe'e xijan n-dandoo ña'a Ianyuux, te xe-joon-ia xa kada-i xaloko xadu'a ka kuu ini mee-i. Kui'a kaa xa ka kida-i chi dava se ka kuu seyii daa ntña'a mee ka-s xndaa. Dani ka kida dava ñadi'i tuku. Kue'e xa januu kuu. ²⁵ Naa xa jandixa koio-i xa ñn xandaa kuu xa n-ja'an Ianyuux, daa xa ka ja'an ñayiu vete ka jandixa-i. Ña xndaxio-i xañu'u nuu-ia, ni ña ka ndadaka'nu-i-ia. Daa nuu xa n-kidava'a-ia xndaxio-i xañu'u te ka ndadaka'nu-i. Mee-ia io xa nduka'nu. Nikava nikuíta, na ku nduka'nu-ia. ²⁶ Xaxe'e xijan n-dandoo ña'a Ianyuux, te xejoon-ia xa kada-i xaloko xadu'a kuu

anu-i xa kada-i. Ñatuka ka tna ini dava ñadi'i xa kava-ña xi'in seyii chi daa ntna'a mee ka-ña xndaa, te ñadu daa vaxi-ña. Ìn xa januu kuu xa ka kida-i.

²⁷ Dani ka kida dava seyii. Ñatuka ka tna ini-s xa kava-s xi'in ñadi'i chi daa ntna'a seyii ka-s xndaa. Yo vichi ka tna ini-s xa daa kada-s. Xa januu kuu, te nde'e nda'u ka ya'a-s xaxe'e xijan. Xijan kuu ta'u-s.

²⁸ Ña tuu nax vi'i ñayiu ya'a xa io Ianyuux. Ka xani ini-i xa ñatu ka ndoñu'u-i-ia. Xijan kuu xa n-dandoo ña'a-ia, te ñatu xejoon-ia xa kani ini koio-i xava'a. Mee ni xaloko xadu'a ka xani ini-i.

²⁹ Mee ni xaloko ñu'u anu-i. Ña tuu nax kuu anu-i xa ka kida-i xaloko xadu'a. Yo unu kajan ini-i tvini. Yo ka kida-i kuechi. Yo ka tna ini-i xa daa kada-i. Yo unu kuedi ini-i. Yo ka xa'ni-i ndiyi. Yo ka tna ini-i xa jantna'a koio-i. Ka danda'u tna'a-i. Yo ka kine'e tnu'u tna'a-i. ³⁰ Ka jan tnu'u tna'a-i. Ka xini u'u-i Ianyuux. Ñatu xndaxio-i xañu'u nuu inka ñayiu chi ka ndandita-i. Unu xe ini-i. Unu i'ni-i. Ka xani ini-i xa kada-i ñn xaloko ta yoo ka kada.

Ka ndandita-i nuu taa nuu di'i-i. ³¹ Ñatuka kuu anu-i xa kada-i xava'a. Ka ja'an-i xa kada-i ñn xa kada-i a juña'a-i ñn xa juña'a-i ñayiu, te ñatu xetna'a tnu'u-i. Ñatu xemani tna'a-i, ni ñatuka kunda'u ini tna'a-i. ³² Juini xna'a-i xa n-ja'an Ianyuux xa jì'in koio ñayiu du'a ka kida andea chi xijan kuu ta'u-i, ko ka kida na'i-i xaloko xadu'a ya'a. Te ñadu xijan ni ka kida-i chi di'uni ka ja'an-i xa io va'a xa ka kida dava ka ñayiu xaloko xadu'a.

2

Kidandaa Ianyuux hora ndadandaa-ia kuechi

ñayiu

¹ Dava-n ka jan tnu'u ñayiu ka kida kuechi, te ka ja'an-n xa io xa ya'a-i juxtixia. ¿Nakuenda xa du'a ka ja'an-n?, te diuni ka kida-n tna'a kuechi ka ja'an-n xa ka kida-i. Xndido xtau-n ñin ñin-n kuechi ka kida-n xaxe'e xa ka kida-n na ka kida ñayiu ijan.

² Xaxe'e xa na'a Ianyuux xa du'a ka kida-n, xijan kuu xa ndadandaa-ia kuechi-n, te ya'a koio-n juxtixia. Xa xna'a-ro xa daa kada-ia. ³ ¿Nakuenda ka ja'an-n xa ya'a koio ñayiu juxtixia te diuni ka kida-n ná ka kida-i? Kuna'a koio-n xa ndadandaa Ianyuux kuechi mee-n, te ya'a koio-n juxtixia. Ma kaku-n xa ji'in-n nuu u'u nuu nda'u. ⁴ ¿Nakuenda ña ka chinuu-n xa taxi-ia tiempo xa natu ini koio-n xa n-ka kida-n kuechi? Va'a-ia xa daa kida-ia. ¿Nakuenda ña ka chinuu-n xa ndetu kuee-ia, ni ña ka chinuu-n xa ka'nu anu-ia? ⁵ Xaxe'e xa unu xee ini-n xi'in xaxe'e xa ña ka jandixa-n Ianyuux xi'in xaxe'e xa ñayo-n ka natu ini xa n-ka kida-n kuechi, dakiti ini ka-n Ianyuux jua'an. Xee kiu kachitnu'u ña'a-ia xa kiti ini-ia nuu-n, te kiu ijan jini-n xa kidandaa-ia hora ndadandaa-ia kuechi ñayiu, te ya'a koio-n juxtixia. ⁶ Ka chiya'u ñayiu n-ka kida xaloko xadu'a kuechi-i, te ni'i ñayiu va'a ta'u-i. ⁷ Ñayiu ka kida xava'a te ka teyika-i mee-i xa kada-i xijan xa na najuen tnu'u ña'a Ianyuux, kada-ia xa kutuu koio-i xi'in-ia ñikava ñikuita. Ka kida-i xava'a, te ka teyika-i mee-i xa kada-i xijan xa maxku naa koio-i xi'in xa na nduu koio-i ñayiu va'a, te kue'e xa juña'a-ia-i. ⁸ Ñayiu ña tuu nax vi'i dava ka ñayiu, te ñatu ka kunda'u ini-i-yi te ña ka jandixa-i xa ka ja'an-da, kada u'u ña'a Ianyuux chi yo vichi kiti ini-ia nuu-i. Kada u'u-ia-i xaxe'e xa ka tna ini-i

xa kada koio-i xaloko xadu'a tuku. ⁹ Nda'u ya'a koio-i, te nde'e yu'u koio-i kiu ijan. Nani nda'u ya'a ñayiu Israel, dani nda'u ya'a ñayiu ñatu ka kuu ñayiu Israel. ¹⁰ Ñayiu ka kida xava'a, kada lanyuux xa nduu koio-i ñayiu va'a ka, te najuen tnu'u ña'a-ia, te kue'e xa juña'a-ia-i. Diuni ndumani-ia xi'in-i xaxe'e xa n-ka natu ini-i xa n-ka kida-i kuechi. Nani kada-ia ñayiu Israel, dani kada-ia ñayiu ñatu kuu ñayiu Israel ¹¹ chi ñatu kaxí-ia ñayiu. ¹² Nux ka kida ñayiu ña n-ka xini ley n-chidotnuni Moisés kuechi, naa koio-i. Naa koio-i, ko ñadu xaxe'e xa ñatu n-ka jandixa-i ley jan. Nux ka kida ñayiu ka xini ley n-chidotnuni Moisés kuechi, ndadandaa lanyuux kuechi-i, te chiya'u-i kuechi-i ná chiya'u ñayiu n-ka xini ley n-chidotnuni Moisés kuechi-i. Ndadandaa-ia kuechi-i xaxe'e xa ña n-ka jandixa-i ley jan. ¹³ Ñayiu ka jandixa ley n-chidotnuni-s kuu ñayiu ña tuu ka na kuechi xndido xtau, ñadu ñayiu xnini ni ley n-chidotnuni-s. ¹⁴ Juini ñatu ka xini ñayiu ñatu ka kuu ñayiu Israel ley n-chidotnuni Moisés, ka kida dava-i na ja'an ley jan xaxe'e xa diuni xndaxio xaxtnuni-i, te ka xani ini-i. ¹⁵ Xijan kuu xa ka xini-i ndeda xa kuu xava'a ndeda xa kuu xaloko. Ka kune ini-i nux ka kida-i ñn kuechi, te nux ña tuu nax ka kida-i, ña tuu nax ka kuu anu-i. Nux ñatu ndaa n-ka kida-i ñn xa ka xidokuechi-i ma kune ini-i. Nux ndaa n-ka kida-i xa ka xidokuechi-i ka kune ini-i. ¹⁶ Xee kiu kada lanyuux xa ndadandaa Jesucristu kuechi n-ka kida ñayiu. Nde ñayiu na'i n-ka kida ñn xa n-ka kida-i ndundaa kuechi-i. Diuni xa'a ka xian tnu'u-da ñayiu vaxi.

Ka xani ini ñayiu Israel xa ka jandixa-i ley n-chidotnuni Moisés

¹⁷ Dava-n ka ja'an i'ni xa ka kuu-n da'ya dana Israel xi'in xa ndeka ña'a Ianyuux. Diuni ka ja'an-n xa nanita'u koio-n xaxe'e xa ka xini-n ley n-chidotnuni Moisés. ¹⁸ Xá xna'a-n nax tna ini Ianyuux xa kada-ro, te ka xini-n ndeda xa kuu xava'a ndeda xa kuu xaloko chi ka ka'u-n ley n-chidotnuni Moisés. ¹⁹ Ka dakua'a-n ñayiu xa n-chidotnuni Moisés, chi ka xani ini-n xa yo va'a ka tu'a-n ley jan. Kuenda kiu ñayiu kuaa ka kuu ñayiu dakua'a-n. Diuni ka xani ini-n xa kuenda kiu luz ka kuu-n xa dakutnuni-n nuu ñayiu ka kuu ná ka kuu ñayiu ka xikonuu xakuaa. ²⁰ Diuni ka dakua'a-n dava ñayiu ta jini ka ley Ianyuux n-chidotnuni Moisés xi'in ñayiu ka kuu ná kuu sekuechi xaxe'e xa ka xani ini-n xa yo va'a ka tu'a-n. Ka ka'u-n libru yodotnuni ley n-chidotnuni Moisés, te ka xini-n xa ñn xandaa kuu. ²¹ Nux ka dakua'a-n ñayiu xa n-chidotnuni Moisés, ¿nakuenda ña ka jandixa mee-n xijan? Ka ja'an-n nuu ñayiu xa ña io va'a xa du'u-ro, te ka du'u-n. ²² Ka ja'an-n nuu ñayiu xa ña va'a xa kava-ro xi'in ñayiu ñatu kuu ñadi'i-ro, te xndaa-n xi'in ñadi'i ñatu ka kuu ñadi'i-n. Ka xini u'u-n Ianyuux ñayiu, te ka du'u-n ndatniu ya'u io veñu'u nuu xdika xijan. ²³ Ka kuu i'ni-n xa ka tu'a-n xa n-chidotnuni Moisés, ko, ¿nakuenda ñatu ka jandixa-n ley jan? Daa kuu xa ñatu io-n xañu'u nuu Ianyuux. ²⁴ Nakaxtna'a xa ka kida-n xi'in xa n-ja'an Ianyuux te yodotnuni. Du'a yodotnuni: “Kui'a ka ja'an ñayiu ñatu ka kuu da'ya dana Israel Ianyuux xaxe'e xa ka kida-n xaloko.” ²⁵ Se ka jandixa ley n-chidotnuni Moisés xiniñu'u xa ka ta'nde ndodo ñi nuu ii-s, ko se n-ta'nde ndodo ñi nuu ii-s te ña jandixa-s ley jan na kada-s

kuenda xa ñatu n-ta'nde ndodo ñ# nuu ii-s. ²⁶ Se ña n-ta'nde ndodo ñ# nuu ii-s te jandixa-s ley jan na kada-s kuenda xa n-ta'nde ndodo ñ# nuu ii-s. ²⁷ Se ñatu n-ka ta'nde ndodo ñ# nuu ii-s, te ka kida-s na ja'an ley jan kadandaa koio-s kuechi mee-n xa ka kuu-n se n-ta'nde ndodo ñ# nuu ii xaxe'e xa ñatu jandixa-n ley jan juini ka ka'u-n libru yodotnuni.

²⁸ Nux ñatu jandixa se ka kuu da'ya dana Israel ley n-chidotnuni Moisés kuenda kiu ñatu ka kuu-s da'ya dana-s juini n-ka ta'nde ndodo ñ# nuu ii-s.

²⁹ Xaxe'e xa va'a anu dava-n dani ka kuu-n ñayiu Israel, ñadu xaxe'e xa n-ta'nde ndodo ñ# nuu ii-n. Ñadu xaxe'e xa ka ka'u-ro ntaka xa n-chidotnuni Moisés najuen tnu'u ña'a Ianyuux; najuen tnu'u ña'a-ia, ko xaxe'e xa ka kida-ro xa juini-ia. Mee-ia kuu Ia najuen tnu'u ña'a, ñadu ñayiu.

3

Ná n-ja'an Ianyuux xa kada-ia, kada-ia

¹ Vaa mee-n xa ka kuu-n ñayiu Israel, kachi koio-n: “Nux daa io, ¿nax kine'e-ro xa ka kuu-ro da'ya dana Israel nudaa? ¿Nax va'a xa n-ta'nde ndodo ñ# nuu ii-ro?” ² Kue'e xa kine'e-ro. Kue'e xa kine'e-ro chi ka ka'u-ro tnu'u Ianyuux n-ka chidotnuni xixitna-ro, te n-kukanu ini ña'a Ianyuux roo xa dakua'a-ro ñayiu. ³ ¿Nax kada Ianyuux xa ñatuka kukanu ini dava ñayiu Israel-ia? Xaxe'e xa ña n-ka kukanu ini-i-ia, ¿ma kada-ia xa n-ja'an-ia xa kada-ia u? ⁴ Kada na'i-ia xa n-ja'an-ia xa kada-ia chi ñatu vete-ia na vete ntdaa ñayiu ñuñayiu. Xandaa xakuiti xetna'a tnu'u-ia. Du'a yodotnuni xa n-ja'an #n se n-ja'an nuu Ianyuux, te n-chidotnuni-s:

Na ja'an ñayiu xa kidandaa-n hora ndadandaa-n
kuechi-i.

D̄iuni na ja'an-i xa va'a n-kida-n xa
n-ndadandaa-n kuechi-i,
kuu-s, n-xia'an-s nuu Ianyuux.

⁵ Xaxe'e xa ka kida ñayiu kuechi, daya'a Ianyuux-yi juxtixia te xaxe'e xijan ja'an koio-i: “Va'a kida Ianyuux xa ndadandaa-ia kuechi-ro ntdaa-ro, te daya'a ña'a-ia juxtixia.” Najuen tnu'u koio-i Ianyuux xa daa ka ja'an-i. ñin xava'a kuu. Vaa ku ja'an koio-ro: “Xaxe'e xa ka najuen tnu'u-i-ia, ñatu io va'a xa kiti ini-ia nuu-i, ni ñatu io va'a xa ndadandaa-ia kuechi-i, ni xa ya'a-i juxtixia.” (Daa ku ja'an-ro chi ñayiu ka kuu-ro, ñadu Ianyuux.) Maxku kani ini-ro xa ñatu kida-ia ná juxtixia kuu-ia. ⁶ Nu ñatu kida ndaa-ia xa ndadandaa-ia kuechi ñayiu, ma ndadandaa-ia kuechi-i n-kuu. ⁷ Ka najuen tnu'u ñayiu kidava'a tnu'u vete Ianyuux chi ka ja'an-i xa ñatu vete-ia ná vete mee-i. ¿Nakuenda xa ndadandaa-ia kuechi-i?, te adichi ka najuen tnu'u ña'a. ⁸ Ka ja'an ñayiu xa ka ja'an-da nuu dava ka ñayiu: “Na kada na'i-ro kuechi chi xaxe'e xijan najuen tnu'u ñayiu Ianyuux hora ndadandaa-ia kuechi-ro te ya'a-ro juxtixia.” Ka ja'an-i xa du'a ka ja'an-da, ko ña ndaa. Ni'i ñayiu du'a ka ja'an ta'u-i.

Ni ñn ñayiu ñatu va'a

⁹ Ñadu xaxe'e xa ka kuu-ro da'ya dana Israel va'a ka-ro dada ñayiu ñatu ka kuu da'ya dana-s. Maxku daa kani ini koio-n chi xá n-ja'an-da xa ntdaa ñayiu ka kida kuechi. ¹⁰ Du'a yodotnuni tnu'u Ianyuux:

Ni ñn ñayiu ñayo kida ntdaa xa juini Ianyuux, juini nga ñn-i.

11 Ñayo ñayiu kida ná io ná jua'an.

Ni ñayo-i nduku tnu'u xa jini-i janda kuu-ia.

12 Ntdaa-i n-ka dandoo Ianyuux.

Mee ni xaloko xadu'a ka kida-i.

Ñayo ka-i ka kida xava'a;

juini nga ñn-i na kada xava'a.

13 Kuenda kiu ndiyi xndaa yau kava ka kuu yaa-i xa nde'e kui'a ka ja'an-i.

Danda'u tna'a-i chi unu vete-i.

Kui'a ka ja'an tna'a-i, te ka jan kui'a tna'a-i.

14 Mee ni xaloko xadu'a xñu'u yu'u-i chi nde'e kui'a ka ja'an tna'a-i.

Nde'e ka ja'an deen nuu tna'a-i chi ka xini u'u tna'a-i.

15 Yo ka kuu anu-i xa ka'ni-i ndiyi.

16 Ka xanu-i, ka ta'u-i, ka kachi-i dava'a nga xa ka ni'i-i xaxe'e xa unu loko-i.

Diuni ka kida u'u tna'a-i, te nda'u ka ya'a-i.

17 Ña yoo-i ka xini xa kutuu mani koio-i.

18 Diuni ñayo-i ka xini xa koo-i xañu'u nuu Ianyuux, ni ña ka yu'u-i nuu-ia.

Du'a yodotnuni.

19 Ka xini-ro xa ñayiu n-kendoo xa ka'u koio-i tnu'u Ianyuux yodotnuni kuu ñayiu io xa jandixa-i-ia. Ni ñn ñayiu maxku ja'an xa ña tuu na kuechi kida-i; nani ka kida ñayiu ñatu kuu ñayiu Israel kuechi, dani ka kida ñayiu Israel kuechi. Xijan kuu xa io xa ndadandaa Ianyuux kuechi ntdanditu'u ñayiu, te ya'a koio-i juxtixia chi ntdaa-i xndido xtau kuechi n-ka kida-i. 20 Ñadu xa ma kundido kutau ka-ro kuechi-ro kuu xa

jandixa-ro ley n-chidotnuni Moisés chi xa kida ley n-chidotnuni-s kuu xa ka xini-ro xa kuechi kuu #n xaloko ka kida-ro.

Ñatuka xndido xtau ñayiu kukanu ini Jesucristu kuechi n-ka kida-i

²¹⁻²² N-ja'an Ianyuux nuu ñayiu nax kada-i xa ma kundido kutau ka-i kuechi n-ka kida-i. N-ja'an-ia xa ma kundido kutau ka-i kuechi n-ka kida-i nux kukanu ini-i Jesucristu. Ñadu xaxe'e xa n-ka jandixa-i ley-ia ma kundido kutau ka-i kuechi n-ka kida-i. Ni ñatu n-chidotnuni Moisés xi'in se n-ka ja'an tnu'u Ianyuux nuu ñayiu xa ley kada xa ma kundido kutau ka-i kuechi n-ka kida-i. Dava'a nga ñayiu kukanu ini Jesucristu ñatuka xndido xtau-i kuechi-i; idii ni xa'a io xa kada-i te ma kundido kutau ka-i kuechi-i. ²³ Xaxe'e xa ntdantu'u-ro ka kida kuechi, inuu ka kuu-ro nuu Ianyuux. Ñayo-ro va'a xa najuen tnu'u ña'a-ia. ²⁴ Ja'an Ianyuux xa ñatuka xndido xtau dava ñayiu kuechi-i xaxe'e xa n-chiya'u Cristu Jesús kuechi-i. Daa n-kida Ianyuux chi kunda'u ini-ia-i. ²⁵⁻²⁶ N-kida Ianyuux xa n-xi'í Jesús xa n-chiya'u-ia kuechi-ro. Na kada-ro kuenda xa kiti n-ka xo doko roo, ñayiu Israel nuu altar Ianyuux n-kuu-ia na n-doko-ia mee-ia na n-xi'í-ia. Mudu ya'a n-dakenaa-ia kuechi-ro xaxe'e xa ka jandixa-ro xa n-chiya'u-ia kuechi-ro xi'in niñi-ia. Daa n-kida Ianyuux xa na kuna'a-ro xa ndaa kada-ia hora ndadandaa-ia kuechi ñayiu te ja'an-ia xa ñatuka xndido xtau-ro kuechi-ro xaxe'e xa n-ka kukanu ini-ro Jesucristu. Antes ñatu n-ndadandaa-ia kuechi ñayiu dava ka país chi n-xo ndetu kuee-ia.

²⁷ Maxku ku ku i'ni da'ya dana Israel xa ka jandixa-i ley n-chidotnuni Moisés chi ñayo-ro ndaku. Na ku ku i'ni-ro xaxe'e xa ka kukanu ini-ro Jesucristu. ²⁸ Maxku ku i'ni-ro xaxe'e xijan chi xá ka xini-ro xa ñadu xaxe'e xa jandixa-ro ley n-chidotnuni Moisés ñatuka xndido xtau-ro kuechi-ro chi xaxe'e xa ka kukanu ini-ro Cristu Jesús. ²⁹ Ñadu diko ni da'ya dana Israel ndeka-ia chi diuni ndeka-ia kue'e ñayiu ñatu kuu da'ya dana Israel vitna; ³⁰ xandaa xakuiti idii ni-ia ndeka ña'a ntdaa-ro. Te ñatu chinuu-ia nuu n-ta'nde ndodo ñi nuu ii sey# a ña'a. Ja'an Ianyuux xa ntdaa ñayiu ka kukanu ini Cristu Jesús ñatuka xndido xtau kuechi-i. ³¹ Juini nanita'u-ro xaxe'e xa kukanu ini-ro Jesucristu, maxku yoo-ro kani ini xa ñatu xiniñu'u ley n-chidotnuni Moisés chi dani xiniñu'u. Xaxe'e xa kukanu ini-ro-ia, ndaku-ro xa jandixa-ro ley jan vitna.

4

N-kukanu ini Abraham Ianyuux

¹ Vaa ka xijan tnu'u tna'a ndixi xa ka kuu-n ñayiu Israel: “¿Janda nanita'u Taa-ro Abraham n-xani ini-s?” ² Ñadu xaxe'e xa n-jandixa Abraham ley Ianyuux ñatuka n-xo ndido tau-s kuechi n-kida-s. Nuú n-jandixa-s ley-ia, vatuka najuen tnu'u-s mee-s n-kuu, ko ñadu nuu Ianyuux. ³ Du'a yodotnuni tnu'u Ianyuux: “Ñatuka ndido tau Abraham kuechi n-kida-s xaxe'e xa n-kukanu ini-s Ianyuux.” ⁴ Ñadu kuta'u ñin ñayiu kidatniu nuu xto'o-i tvini chiya'u ña'a-s chi ya'u-i kuu. ⁵ Ñayiu ñatu ka kida xa juini Ianyuux, ni ñatu ka jandixa-i ley-ia, te ka jandixa-i xa kada-ia

xa ma kundido kutau ka ñayiu ka kukanu ini-ia
kuechi n-ka kida-i, kuenda kiu ka jandixa-i ley-ia.

⁶ Nakaxtna'a xa'a xi'in xa n-chidotnuni David. N-chidotnuni-s xa ka kudi ini dava ñayiu n-ka kida
kue'e kuechi xaxe'e xa n-ja'an Ianyuux xa ñatuka
xndido xtau-i kuechi-i. N-ja'an-ia xa ñatuka xn-
dido xtau-i kuechi-i, ko ñadu xaxe'e xa n-ka kida-i
xava'a. Du'a n-chidotnuni-s:

⁷ Naka ta'u ñayiu n-taxkanu ini Ianyuux kuechi
n-ka kida-i.

Ma chinuu ka-ia kuechi n-kida-i.

⁸ Naka ta'u-i chi kuenda kiu ña tuu na kuechi
n-kida-i chi ñatuka ja'an-ia xa io kuechi-i.

⁹ Ñadu mee ni se jandixa xa io xa ta'nde ndodo
ñii nuu ii-s kuu se ta'u kuu chi diuni ta'u kuu
se ñatu ka xini xa daa kada-s. Xa n-ja'an-da
xa yodotnuni xa: “Ñatuka n-xo ndido tau Abra-
ham kuechi-s xaxe'e xa n-kukanu ini-s Ianyuux.”

¹⁰ ¿Ñatu xna'a-n xa na ta ta'nde ndodo ka ñii nuu
ii-s n-ja'an Ianyuux xa ñatuka ndido tau-s kuechi-s
a? ¹¹ Xa na kuna'a-s xa xaxe'e xa n-kukanu ini-s
Ianyuux ñatuka n-xo ndido tau-s kuechi-s, n-ta'nde
ndodo ñii nuu ii-s. Xa'a n-kida-ia xa na kua'a ku
kuu-s taa nuu ntdaa se ka kukanu ini Ianyuux
te ñatu n-ta'nde ndodo ñii nuu ii-s. Kuu-s taa-s
ntdaa-s xi'in da'ya dana-s chi diu-s kuu se ki'na
nuu n-kukanu ini Ianyuux xa na kukanu ini ntdaa
ñayiu-ia tuku, te ma kundido kutau ka-i kuechi
n-ka kida-i. ¹² Kuu-s taa nuu ntdaa se ka ta'nde
ndodo ñii nuu ii-s xaxe'e xa diu-s kuu se ki'na
nuu n-ta'nde ndodo ñii nuu ii-s. Diuni kuu-s taa
nuu koio se ya'a xaxe'e xa diu-s kuu se ki'na nuu
n-kukanu ini Ianyuux xa na kukanu ini koio-s xi'in
da'ya-s-ia.

13 N-xia'an Ianyuux tnu'u-ia Abraham xa kendoo-s xi'in dava da'ya dana-s xi'in ñuñayiu. Ñadu xaxe'e xa n-jandixa-s ley-ia kendoo koio-i xi'in ñuñayiu. Kendoo koio-i xi'in ñuñayiu, ko xaxe'e xa ñatuka xndido xtau-i kuechi n-ka kida-i. Ñatuka xndido xtau-i kuechi-i xaxe'e xa n-ka kukanu ini-i-ia. 14 Nu n-xio xa jandixa-ro ley Ianyuux ni'i-ro ta'u-ro, ñatu n-xio xa kukanu ini-ro-ia te ma taxi-ia tnu'u-ia xa taxi-ia ñn xa taxi-ia n-kuu. 15 Xaxe'e xa io ley te ña tuu jandixa-ro, kiti ini Ianyuux nuu-ro, ko nu ña tuu na ley n-xio n-kuu, ma ja'an Ianyuux xa ñatu n-jandixa-ro ley. 16 Xaxe'e xa ka kukanu ini-ro-ia, xijan kuu xa n-ja'an-ia xa taxi-ia ñn xa taxi-ia. Ña tuu nax jenyau-ia kiu na taxi-ia xa n-ja'an-ia xa taxi-ia xaxe'e xa kunda'u ini ña'a-ia. Xaxe'e xijan ntdaa ñayiu kukanu ini-ia xa juña'a-ia-i xa n-ja'an-ia xa juña'a-ia-i ná n-kukanu ini Abraham-ia xa juña'a-ia xa n-ja'an-ia; ñadu mee ni ñayiu ka ka'u ley-ia kuu ñayiu ni'i xa n-xia'an-ia xa juña'a-ia. Taa-ro ntdaa-ro xi'in ñayiu ijan kuu-s. 17 Du'a yodotnuni xa n-ja'an Ianyuux nuu Abraham: “Kada-r xa kue'e da'ya dana-n koo, te kue'e nación koo xaxe'e xa koo-i.” N-jandixa Abraham xa daa kada Ianyuux. Kuu-ia Ia kida xa nandoto ndiyi, te kani ini-ia ñn xa ta koo ka. 18 Juini ñatuka n-xio xa koo da'ya Abraham xi'in ñadi'i-s, ko n-kukanu ini-s Ianyuux xa kada-ia xa ku kuu-s xixitna kue'e da'ya dana-s ná n-ja'an-ia nuu-s. Diuni n-ja'an-ia nuu-s: “N-ja'an-r xa koo da'ya dana-n, te koo-i.” 19 Xaxe'e xa n-kukanu ini-s xa jin tna'a xa n-ja'an Ianyuux, n-ñu ini-s xa koo da'ya-s juini n-yi-s, te juini xaku nga xa

chitu-s ñin cientu kuia te juini n-yñ Sara tuku. ²⁰ Ñatu n-xe tññ anu-s chi n-xani ini-s xa ndaa jin tna'a tnu'u lanyuux. N-kukanu ini-s xa jin tna'a tnu'u n-ja'an-ia nuu-s chi n-jandixa-s-ia. N-kuvete-ia xa daa n-xani ini-s. ²¹ N-jandixa-s xa koo da'ya-s xi'in ñadi'i-s ná n-ja'an lanyuux chi n-xo na'a-s xa kua'a-ia xa kada-ia dava'a nga xa juini-ia. ²² Xaxe'e xa n-kukanu ini-s-ia, n-ja'an-ia xa ñatuka ndido tau-s kuechi-s. ²³ Ñadu ni Abraham n-ja'an-ia xa ma kundido kutau ka kuechi-s ²⁴ chi dani roo xa ka kuu-ro ñayiu ka jandixa xa n-nadandoto-ia Jesús, Ia kuu Xto'o-ro, ma kundido kutau-ro kuechi-ro. ²⁵ Mee-ia kuu Ia n-xi'í xaxe'e kuechi-ro te n-nandoto-ia xa ma kundido kutau ka-ro kuechi-ro.

5

Xtuu ndaa xtuu vatu ñayiu ñatu xndido xtau ka kuechi n-ka kida-i

¹ Xaxe'e xa kukanu ini-ro Jesucristu ñatuka xndido xtau-ro kuechi n-ka kida-ro, te xaxe'e xa ñatuka xndido xtau-ro kuechi n-ka kida-ro ñatuka kiti ini lanyuux nuu-ro, te kundaa kuvatu anu-ro. Xa maxku ku kiti ini ka lanyuux nuu-ro n-xi'í Jesucristu, Ia kuu Xto'o-ro. ² Diuni xaxe'e xa n-xi'í-ia xaxe'e kuechi-ro, n-kunda'u ini ña'a lanyuux, te dani ku kunda'u ini ña'a-ia. Xaxe'e xa n-ka kukanu ini-ro lanyuux xa dananita'u ña'a-ia, daa n-kida ña'a-ia. Ka kudi ini-ro chi ñu ini-ro xa kada-ia xa nduu koio-ro ñayiu va'a. ³ Diuni kudi ini-ro xaxe'e xa nda'u ka ya'a-ro xaxe'e-ia, te xaxe'e xijan dani kundee ini-ro vaxi nuu xijan. ⁴ Xaxe'e xa dani kundee ini-ro vaxi, nduu-ro ñayiu va'a. Xaxe'e xa nduu-ro ñayiu va'a, ka xini-ro xandaa

xakuiti najuen tnu'u ña'a-ia. ⁵ Xñu ini-ro xa najuen tnu'u ña'a-ia, te ma danda'u ña'a-ia xaxe'e xa yo vichi xemani ña'a-ia. N-kida-ia xa n-keé Espíritu Ianyuux anu-ro xa na kuna'a-ro xa xemani ña'a-ia. ⁶ Tiempo ta jini ka-ro xa kada-ro xava'a n-xi'í Cristu xaxe'e ñayiu ka kida kuechi. Xa daa nga n-xantuu Ianyuux xa tiempo ijan kuú-ia. ⁷ Ñayo ñayiu xadi nuu inka ñayiu va'a io xa kuú-i. Diuni xaku ni ñayiu kuyii xa kuú-i nuu iin ñayiu va'a n-kida ña'a. ⁸ Ñayo daa ka kida, ko Ianyuux, n-kida-ia xa n-xi'í Cristu xaxe'e-ro juini n-ka xo kida-ro kuechi xaxe'e xa xemani ña'a-ia. ⁹ N-xi'í Cristu Jesús xa maxku kundido kutau ka-ro kuechi-ro; naka vitna ma ku kada-ia xa maxku kiti ini Ianyuux nuu-ro. ¹⁰ N-kumani Ianyuux xi'in-ro xaxe'e xa n-xi'í da'ya yii-ia xaxe'e-ro. Kiu ka n-xo kiti ini Ianyuux nuu-ro n-kida-ia xa n-kumani-ro xi'in-ia, naka vitna xa ndito Da'ya Yii-ia, ma ku kada-ia xa ni'i-ro ta'u-ro. ¹¹ Te ñadu xa'a ni kuu ntdaa xa n-kida Jesucristu, Ia n-kida xa n-kumani-ro xi'in Ianyuux, chi diuni n-kida-ia xa ka kudi ini-ro xaxe'e xa kunduu-ro xi'in Ianyuux.

Adán xi'in Cristu

¹² Xaxe'e kuechi idii seyii, n-xe koo kuechi ñuñayiu. N-kida-s kuechi te n-xi'í-s. Xaxe'e kuechi idii se ijan, ntdaa-ro ka kida kuechi te ntdaa-ro ka xi'í. ¹³ Xa daa nga n-ka xo kida ñayiu kuechi, na ta koo ka ley n-chidotnuni Moisés. Xa daa nga n-ka xo kida ñayiu kuechi, ko ñatu n-ja'an Ianyuux tiempo daa xa ñatu n-ka jandixa ñayiu ley chi ta koo ka ley. ¹⁴ Nde na n-xo tuu Adán xi'in nde tiempo n-xo tuu Moisés ñuñayiu, n-ka xo xi'í ñayiu

xaxe'e kuechi n-ka kida-i. Ka xi'í-i, ko ñadu xaxe'e xa n-ka kida-i kuechi n-kida Adán. Xaxe'e Adán ka kida ñayiu kuechi, te xaxe'e Jesús, Ia n-kixi, kue'e ñayiu ka kida xava'a.

¹⁵ Tuku n-kida ña'a Adán, te tuku n-kida ña'a Ianyuux; ñatu inuu kuu. Xaxe'e kuechi n-kida idii seyii kue'e ñayiu n-ka xi'í, te xaxe'e idii ni xa n-kida Jesucristu, va'a Ianyuux nuu ñayiu ka kukanu ini-ia. N-kida-ia xa ñatuka xndido xtau-ro kuechi-ro. ¹⁶ Kue'e xa ka ya'a-ro xaxe'e Adán, te va'a kida ña'a Ianyuux. Xaxe'e idii kuechi n-kida se ya'a n-xio xa chiya'u-ro ntdaa-ro kuechi-ro. Kue'e kuechi n-ka kida-ro, ko n-kida Ianyuux xa ñatuka xndido xtau-ro kuechi n-ka kida-ro, te ña tuu nax janya'u-ia. ¹⁷ Xaxe'e idii kuechi n-kida se ya'a ka xi'í ñayiu, te xaxe'e idii Ia kuu Jesucristu, vichi va'a Ianyuux nuu ñayiu ka kukanu ini-ia. N-kida Ianyuux xa ñatuka xndido xtau-ro kuechi-ro xi'in xa kutuu-ro ñikava ñikuita andiu. Diuni n-kida-ia xa taxnuni koio-ro, te ña tuu nax janya'u-ia xa daa n-kida-ia. ¹⁸ Na ja'an ntuku-da xa xá n-ja'an-da. Xaxe'e idii kuechi n-kida ñn seyii n-xio xa chiya'u ntdaa ñayiu kuechi n-ka kida-i, dani xaxe'e ñn xa n-kida Jesucristu ñatuka xndido xtau dava-i kuechi-i te kue'e-i kutuu nuu tuu-ia ñikava ñikuita. ¹⁹ Xaxe'e xa ñatu n-jandixa ñn seyii Ianyuux, kue'e ñayiu ka kida kuechi; te xaxe'e xa idii Ia n-kuu se n-jandixa ley Ianyuux, kue'e ñayiu ka jandixa-ia. ²⁰ Xa na jini ñayiu xa kuechi kuu ñn xaloko ka kida-i, n-xe koo ley n-chidotnuni Moisés. Nu n-ka xini-i xa kuechi kuu ñn xaloko ka kida-i, kue'e ka kuechi n-ka kida-i. Xaxe'e xa yo kue'e ka kuechi ka kida ñayiu jua'an, n-kunda'u ini ña'a ka Ianyuux. ²¹ Ka kida-ro kuechi, te ka xi'í-ro

xaxe'e xijan. Xaxe'e xa ka xi'í-ro n-kunda'u ini ña'a Ianyuux, te n-kida-ia xa nduu-ro ñayiu ñatuka xndido xtau kuechi n-ka kida na kua'a kutuu-ro nuu tuu-ia ñikava ñikuita. Xaxe'e xa n-kida Jesu-cristu, Ia kuu Xto'o-ro ñin xa n-kida-ia, xijan kuu xa daa n-kida ña'a Ianyuux.

6

Kuenda kiu ndiyi n-ka xo kuu-ro xaxe'e kuechi n-ka xo kida-ro

¹ Vaa kachi koio-n: “Nux daa kuu na kada na'i ka-ro kuechi nudaa chi taxkanu ini Ianyuux xa kida-ro xijan xaxe'e xa kunda'u ini ña'a-ia.” ² Ñadu xa daa ku kani ini koio-n chi ña tuu ka nax ka io xa dada'an ña'a xa ku kada-ro xava'a chi n-ka dandoo-ro xaloko xadu'a n-ka xo kida-ro. Inka ñayiu nduu-ro vitna. ³⁻⁴ Kuenda kiu n-ka xi'í-ro xi'in Cristu Jesús te n-ka yinduxi-ro xi'in-ia xa n-ka xendute-ro. Xa n-nadandoto Ianyuux-ia kuenda kiu n-nadandoto ña'a-ia roo tuku, te ma ku kuu ka-ro ná n-ka xo kuu-ro. N-nadandoto Ianyuux-ia chi kua'a-ia xa daa kada-ia. ⁵ Diuni xaxe'e xa kuenda kiu n-ka xi'í-ro na n-xi'í Jesucristu, nandoto-ro kiu na ndixi-ia xaxe'e xa n-nandoto mee-ia. ⁶ Xaxe'e xa kuenda kiu n-ka xitakaa dika-ro xi'in-ia na n-xitakaa dika-ia, ñatuka kuu anu-ro xa kada-ro kuechi n-ka xo kida-ro. Ñatuka kuu anu-ro xa kada-ro kuechi n-ka xo kida-ro chi n-ka dandoo-ro xijan. Xna'a-ro xa daa n-ya'a.

⁷ Diuni xaxe'e xa kuenda kiu n-ka xi'í-ro xi'in Cristu n-dayaa ña'a-ia nuu xijan. ⁸ Xaxe'e xa kuenda kiu n-ka xi'í-ro xi'in Cristu, n-ka kukanu ini-ro xa kutuu-ro nuu tuu-ia ñikava ñikuita. ⁹ Xna'a-ro xa n-nandoto Cristu te ma kuú ka-ia. Ni ñin nuu kue'e ma ka'ni ña'a. ¹⁰ Ma kuú ntuku-ia

xaxe'e kuechi n-ka xo kida-ro chi idii ni vuelta n-xi'í-ia xaxe'e xijan. N-nandoto-ia te kida-ia nt-daa xa juini Ianyuux. ¹¹ Dani roo, xaxe'e xa n-ka dandoo-ro xaloko xadu'a n-ka xo kida-ro, kuenda kiu xa n-ka xi'í-ro te n-ka nandoto-ro te n-ka nduu-ro inka ñayiu. Xaxe'e xijan ka kida-ro xa juini Ianyuux vitna, chi ka kunduu-ro xi'in Cristu Jesús.

¹² Xaxe'e xijan maxku juejoon koio ka-n xa tax-nuni xaloko nuu-n na kua'a maxku kada ka-n kuechi ka kida-n vaxi, chi ka kuu anu-n xa kada-n xaloko xaxe'e xa ka kuu-n ñayiu ñuñayiu. ¹³ Maxku kada ka-n kuechi xaxe'e yu'u-n, nda'a-n, nduchi nuu-n. Naa xa kada ka-n kuechi xaxe'e ndruni xijan, kada-n xa ta'u tniu Ianyuux. Kada-n xava'a chi ñatuka kuu-n ná n-ka xo kuu-n; tuku ñayiu ka kuu-n vitna. ¹⁴ Ñatuka kuu anu-ro xa kada-ro kuechi n-ka xo kida-ro chi ñatuka kuu anu-ro xa kada-ro xijan. Xaxe'e xa kunda'u ini ña'a Ianyuux, ñatuka taxnuni xijan nuu-ro; ñadu xaxe'e xa ka jandixa-ro ley ñatuka taxnuni xijan nuu-ro.

Ná ka kuu ñayiu n-ka xia'an tnu'u-i xto'o-i xa kadatniu du'a-i ka kuu ñayiu ka jandixa Ianyuux

¹⁵ Vaa kachi koio-n: “Nux daa io na kada na'i-ro kuechi nudaa chi xaxe'e xa kunda'u ini ña'a Ianyuux xi'in xa n-taxkanu ini-ia xa n-ka kida-ro kuechi nanita'u-ro; ñadu xaxe'e xa jandixa-ro ley.”

¹⁶ Ná ka kuu ñayiu n-ka xia'an tnu'u-i nuu se ku kuu xto'o-i xa kadatniu du'a-i, te kada koio-i xa ta'u tniu-s nuu-i ka kuu ñayiu ka kida xa ta'u tniu Ianyuux nuu-i xi'in ñayiu ka kida xaloko kuu anu-i xa kada-i. Io xa jandixa koio ñayiu jan xto'o-i hora ta'u tniu-s nuu-i chi n-ka xia'an-i tnu'u-i xa jandixa-i-si. Ñayiu ka kida xaloko kuu anu-i xa

kada-i, dandoo ña'a Ianyuux, te ñayiu ka kida xa ta'u tniu Ianyuux ñatuka xndido xtau-i kuechi-i. ¹⁷ N-ka xo kida-n xaloko n-kuu anu-n xa kada-n. Ná ka kuu ñayiu ka xinokuechi nuu xto'o-i kiu xi'in kiu n-ka xo kuu-n. Ko vitna, n-ka dandoo-n xijan chi ka jandixa-n xa ñn xandaa kuu xa n-ka dakua'a ña'a ñayiu ka kukanu ini Cristu Jesús, te ñatuka xe tñi anu-n. Na kuta'u-ro nuu Ianyuux xa n-ka jandixa-n xa ñn xandaa kuu xa n-ka dakua'a ña'a ñayiu ijan. ¹⁸ Kuenda kiu n-ka yaa-n nuu se kuu xto'o-n xa ñatuka ka kida-n xaloko xadu'a. N-ka kixe'e-n ka xinokuechi-n nuu Ianyuux vitna, te ka kida-n xa ta'u tniu-ia nuu-n. ¹⁹ Du'a kakune'e-da xa na kua'a na kutnuni ini koio-n xa ja'an-da chi ñayiu ñuñayiu ka kuu-n. N-ka xo kida-n kuechi xaxe'e yu'u-n, nda'a-n, nduchi nuu-n. N-ka xo kida-n xaloko xadu'a n-ka xo kuu ini ndixi; ñatu n-ka xo kida-n ná ja'an ley. Na xa kada koio ka-n kuechi xaxe'e ndruni xijan, kada-n xa ta'u tniu Ianyuux vitna, te kadatniu ka-ia anu-n te kada ka-n xa juini-ia. ²⁰ Tiempu ta dandoo ka-n xaloko n-ka xo kida-n, ña n-kuu xa jandixa koio-n ley Ianyuux chi n-ka xo kida-n xa n-kuu anu-n xa kada-n. Ná kuu ñayiu ka jandixa xto'o-i n-ka xo kuu-n. ²¹ Ña tuu nax n-ka kine'e-n xa n-ka xo kida-n xaloko xadu'a. Ka kujanuu-n vitna xa n-ka xo kida-n xijan. Dandoo Ianyuux ñayiu ka kida ná n-ka xo kida-n. ²² Kuenda kiu ñayiu n-ka yaa nuu xto'o-i ka kuu-n vitna te ka xinokuechi-n nuu Ianyuux ná ka xinokuechi-ro nuu ñayiu kuu xto'o-ro. Kadatniu ka-ia anu-n te kada ka-n xa juini-ia. Xaxe'e xijan kutuu koio-n nuu tuu-ya ñikava ñikuita. ²³ Dandoo Ianyuux ñayiu dani ka

kida xaloko xadu'a kuu anu-i xa kada-i. Te roo, ñayiu ka xinokuechi nuu Ianyuux, kutuu koio-ro nuu tuu-ia ñikava ñikuita xaxe'e xa n-xi'í Cristu Jesús, Ia kuu Xto'o-ro xaxe'e-ro. Xijan kuu ta'u-ro.

7

Ná ka kuu ñayiu n-tnunda'a ka kuu ñayiu ka jandixa ley Ianyuux

¹ Mee-n, ñayiu ka xini ley Ianyuux, ka xini-n xa io xa jandixa-ro ley jan hora xndito-ro te nux n-ka xi'í-ro ñatuka io xa jandixa-ro ley jan. ² Ná kuu iin ñadi'i n-tnunda'a ka kuu-ro xa ka jandixa-ro ley jan. Iin ñá n-tnunda'a, ma kuu xa dandoo-ña yii-ña xa natnunda'a-ña xi'in inka-s chi daa io ley Ianyuux xaxe'e xa n-tnunda'a-ña xi'in-s. Ko nux n-xi'í yii-ña ña tuu nax kuu xa natnunda'a-ña xi'in inka-s. ³ Nux tuu yii iin ñadi'i te n-chitna'a-ña xi'in inka seyii, kida-ña kuechi, ko nux n-xi'í yii-ña, ñatu io ley ja'an xa ma kuu xa natnunda'a-ña xi'in inka seyii. Ña tuu na kuechi kada-ña xa natnunda'a-ña xi'in inka-s. ⁴ Ná kuu ñadi'i n-xi'í yii ka kuu-ro xa ñatuka taxnuni ley n-chidotnuni Moisés nuu-ro chi kuenda kiu n-ka xi'í-ro na n-xi'í Cristu, te kuenda kiu n-ka nandoto-ro xi'in-ia na n-nandoto-ia xa n-xi'í-ia, te n-xeka ña'a-ia xa na kua'a na kada-ro xa juini Ianyuux. ⁵ Kue'e kuechi n-ka xo kida-ro na n-ka xo kuu anu-ro xa kada-ro xaloko xadu'a xaxe'e xa n-ka xo ka'u-ro ley Moisés chi daa vaxi-ro ñuñayiu. Xaxe'e xijan dandoo ña'a Ianyuux ñikava ñikuita n-kuu. ⁶ Kuenda kiu ñayiu n-ka yaa nuu xto'o-i ka kuu-ro xa ñatuka io xa jandixa-ro ley n-chidotnuni Moisés. Ñatuka io xa jandixa-ro ley jan chi kuenda kiu n-ka

xi'í-ro te n-ka nandoto-ro xa junukuechi-ro nuu Ianyuux. Ñadu xaxe'e ley n-chidotnuni Moisés xinokuechi-ro nuu-ia vitna, chi xaxe'e xa kidatni-u-ia anu-ro daa ka kuu anu-ro.

Kida Spalu kuechi

⁷ Vaa kachi koio-n vitna xa: “Ñatu xiniñu'u ley”, xaxe'e xa du'a ja'an-da. Maxku du'a kani ini koio-n chi xiniñu'u ley chi nuu ñatu n-xio ley n-chidotnuni Moisés, ma kutnuni ini-da xa kuechi kuu ñn xaloko kida-da n-kuu. Nuú ñatu n-yodotnuni, “Maxku kukajan ini-n xaxii ñayiu”, ma uun kani ini-da xa kuechi kuu xijan n-kuu.

⁸ N-kunuu kuechi nuu ley jan chi yo n-xo kukajan ini-da xaxii ñayiu. Juini kue'e xa n-ka xo kida ñayiu, na ta koo ka ley, ko ña yoo n-ja'an xa kuechi kuu xa n-ka xo kida-i. ⁹ Ña tuu nax n-xo kuu anu-da hora n-xo kida-da kuechi, chi ñatu n-xini-da nax kuu ley, ko kiu n-xini-da xa io ley, n-kuu ka anu-da xa kada-da xaloko. ¹⁰ N-xani ini-da xa jandixa-da ley jan te kutuu-da nuu tuu Ianyuux ñikava ñikuita, ko ñatu n-kuu xaxe'e xa ñatu n-jandixa ndi'i-da ley jan. Te xaxe'e xijan n-xio xa dandoo ña'a-ia n-kuu.

¹¹ Xaxe'e xa n-kunuu kuechi nuu ley jan ñatu ndaku-da xa jandixa-da, te ñatu n-xee xa kada-da ná n-xani ini-da. Xaxe'e xijan n-xio xa dandoo ña'a Ianyuux n-kuu.

¹² Ii ley Ianyuux n-chidotnuni Moisés, ii ñn ñn tnu'u n-ja'an-ia na n-ta'u tni-u-ia, te diuni va'a. Ja'an ley xa io xa kada-ro ñn xa ka kida-ro ná io ná jua'an xa kada-ro. ¹³ Vaa kachi koio-n: “¿Nakuenda xa ja'an-s xa va'a ley, te diuni ja'an-s xa xaxe'e ley ijan dandoo ña'a Ianyuux?” Vaa daa kani ini koio-n, ko ñadu ley n-kida xa n-xio

xa dandoo ña'a-ia chi xaxe'e kuechi n-ka kida-ro
 n-xio xa dandoo ña'a-ia. Va'a ley jan. Nu n-ka'u-da
 ley, n-kutnuni ini-da xa kue'e kuechi n-kida-da
 te xaxe'e xijan n-xio xa dandoo ña'a-ia. Diuni xa
 n-ka'u-da ley n-xini-da xa yo kiti ini Ianyuux nuu
 ñayiu ka kida kuechi. ¹⁴ N-xani ini Ianyuux ley xa
 kachitnu'u ña'a-ia ndeda xa kuu xava'a kada-ro,
 ko xaxe'e xa kuu-da ñayiu ñuñayiu, kida-da kuechi.
 Ná kuu ñn se jandixa xto'o-s kuu-da xa daa
 kida-da. ¹⁵ Ñatu xini-da nax tna'a-da xa naa xa
 kada-da xava'a kuu anu-da xa kada-da, daa xa
 ñatu kuu anu-da xa kada-da kida-da. ¹⁶ Xaxe'e
 xa xini-da xa io va'a xa ka jandixa-ro ley jan, io
 anu-da xa jandixa-da. ¹⁷ Ñadu mee-da io kuechi xa
 kida-da kuechi; kida-da chi daa vaxi-da ñuñayiu.
¹⁸ Najandixa-da xa ña tuu nax va'a ñu'u anu-da
 xaxe'e xa kuu-da ñayiu ñuñayiu. Juini kuu anu-da
 xa kada-da xava'a, ko ñatu ndaku-da. ¹⁹ Ñatu
 kida-da xava'a juini-da xa kada-da, chi daa xaloko
 ña kuu anu-da xa kada-da kida-da. ²⁰ Xaxe'e xa
 ñatu kuu anu-da xa kada-da xaloko, xijan kuu xa
 ñadu mee-da io kuechi xa kida-da kuechi; kida-da
 kuechi chi daa vaxi-da ñuñayiu. ²¹ Juini kuu
 anu-da xa kada-da ñn xava'a, ko ñatu kida-da
 xava'a chi mee ni xaloko xani ini-da. Du'a ya'a-da.
²² Io va'a xa io ley Ianyuux. Tna ini-da, ²³ ko xaxe'e
 xa io ñn xa dada'an xa kada-da xa ñu ini-da xa
 kada-da, ñatu ndaku-da xa jandixa-da ley jan. Xa
 dada'an kuu xaloko ñu'u anu-da. Ná kuu ñn se
 yindi'u xa ñatu kua'a xa kuikonuu kuaan-s kuu-da.
²⁴ Naka vichi tnaui ini-da xa daa ya'a-da. Nda'u-da.
 ¿Jundu kada xa ma kada ka-da kuechi ñini na
 kutuu ka-da ñuñayiu?, ²⁵ nani Ianyuux. Idii mee-ia
 kada xa ma kada ka-da kuechi xaxe'e xa n-xi'í

Jesucristu, Ia kuu Xto'o-ro xaxe'e-ro. Na kuta'u-da nuu-ia. ñn se kidatniu du'a nuu xto'o-s, io xa jandixa-s xto'o-s. Vitna dada n-kutnuni ini-da xa io xa jandixa-da ley Ianyuux ná jandixa se ijan xto'o-s, ko xaxe'e xa kuu-da ñayiu, kida na'i-da kuechi. Ná kuu ñn se kidatniu du'a nuu xto'o-s kuu-da xa kida na'i-da kuechi.

8

Ndeka Espíritu Ianyuux ñayiu

¹ Ma ja'an ka-ia xa io kuechi roo, ñayiu ka kunduu xi'in Cristu Jesús, ni ma ja'an-ia xa io xa chiya'u-ro kuechi-ro. ² Xaxe'e xa ka kunduu-ro xi'in-ia n-kixe'e Espíritu Ianyuux xa taxnuni-ia nuu-ro. Ka kuu-ro ná ka kuu ñayiu n-ka yaa nuu xto'o-i vitna. Ñatuka kuu anu-ro xa kada ka-ro kuechi n-ka xo kida-ro, te xaxe'e xijan ma dandoo ña'a Ianyuux, te kutuu-ro andiu nuu tuu-ia. ³ Xaxe'e xa ñatu ka ndaku ñayiu xa jandixa-i ley kundido kutau-i kuechi-i n-kuu, te ntdaa-i ji'in andea. Ñatu ka ndaku-i xaxe'e xa ka kuu-i ñayiu ñuñayiu. Xaxe'e xijan n-tunda'a Ianyuux Da'ya Yii-ia ñuñayiu xa kuú-ia xaxe'e kuechi-ro xi'in-i. Ná xndaa roo, ñayiu ka kida kuechi, n-kaa Da'ya Yii-ia. Idii mee-ia n-ndaku xa n-jandixa-ia ley Ianyuux. N-xi'í-ia xa na kua'a ndaku-ro xa jandixa-ro ley-ia. ⁴ Ndaku-ro xa jandixa-ro ley vitna chi ñatuka ka kida-ro xa n-xo kuu anu-ro xa kada-ro. Ka kida-ro xa juuni Espíritu Ianyuux chi ndeka ña'a-ia. ⁵ Ñayiu ka kida mee ni xaloko xadu'a, te ka kukajan ini-i xa io ñuñayiu ya'a, mee ni xijan xñu ini-i. Ko ñayiu ka xani ini ná xani ini Espíritu Ianyuux, ka kuu anu-i xa kada-i mee ni xa juuni mee-ia. ⁶ Ñayiu ka

kida xa ka kuu ini mee-i, te ka kida-i xa ka kuu anu-i xa kada-i, kuenda kiu n-ka xi'í-i chi ñatu ka kunduu-i xi'in Ianyuux. Ñayiu ka xani ini ná xani ini Espíritu-ia, kutuu-i nuu tuu-ia ñikava ñikuita, te kundaa kuvatu anu-i chi n-ka natu ini-i xa n-ka kida-i kuechi. ⁷ Ñayiu ka kida xa kuu ini mee-i ka xini u'u-i Ianyuux, te ñatu kuu anu-i xa jandixa-i ley-ia, ni ma ndaku-i xa jandixa-i. ⁸ Ñayiu ka kida xa kuu ini mee-i jan, ma ndaku-i xa kada-i xa tna ini Ianyuux. ⁹ Daa ka kuu ñayiu ya'a, ko ndixi, xaxe'e xa kunduu-n xi'in Espíritu Ianyuux, ñatu daa ka kuu-n chi ñu'u ña'a-ia. Ñayiu ñatu ñu'u ña'a Espíritu Cristu, ñatu ndeka ña'a Cristu. ¹⁰ Juini na kuú koio-ro xaxe'e xa ka kuu-ro ñayiu ka kida kuechi, ko nux kunduu-ro xi'in Cristu, nandoto-ro te kutuu-ro xi'in-ia ñikava ñikuita. ¹¹ Xaxe'e xa ñu'u ña'a Espíritu Ianyuux, Ia n-nadandoto Jesús na n-xi'í-ia, nadandoto ña'a Ianyuux roo na kuú-ro tuku.

¹² Kidajuexa Ianyuux xa maxku kada-ro xaloko kuu anu-ro xa kada-ro. ¹³ Nux dani ka kida dava-n mee ni xa loko kuu anu-n xa kada-n, dandoo ña'a Ianyuux, ko nux na dandoo-n xijan, kutuu-n nuu tuu-ia ñikava ñikuita. Espíritu Ianyuux kida xa dandoo ñayiu xijan. ¹⁴ Nux Espíritu Ianyuux, ndeka ña'a, da'ya Ianyuux ka kuu-ro. ¹⁵ Ñatu kida Espíritu Ianyuux xa ku yu'u-ro nuu Ianyuux ná n-ka xo yu'u-ro. N-ka xo yu'u-ro ná ka yu'u ñayiu ka kidatniu du'a nuu xto'o-i. Ñatuka yu'u-ro chi kida-ia xa ja'an-ro nuu Taa-ro Ianyuux: “Abba.” (Taa-ro kuu tnu'u mee-ro.) ¹⁶ Nani xini Espíritu-ia xa ka kuu-ro da'ya Ianyuux, dani xini roo. ¹⁷ Hora na juña'a Ianyuux ta'u Cristu, ni'i-ro xa n-ja'an-ia

xa taxi-ia xaxe'e xa ka kuu-ro Da'ya-ia. Xijan kuu ta'u-ro. Xaxe'e xa nda'u ka ya'a-ro ná nda'u n-ya'a Cristu, nduka'nu-ro xi'in-ia.

Yo vichi ku nduka'nu-ro andiu

¹⁸ Yo nda'u ya'a-ro tiempo ya'a, ko vichi va'a kada ña'a Ianyuux chi yo vichi ku nduka'nu-ro. ¹⁹ Ntdaa ñayiu xi'in ntdaa ka xa n-xani ini Ianyuux xna'a xa dande'a-ia-i jundu ka kuu da'ya-ia. Yo ka kuu anu-i xa jini-i da'ya-ia; naxku na jini ña'a-i vitnadii. ²⁰ N-kida Ianyuux xa ña ndaku ka ntdaa xa n-kidava'a-ia xi'in ñayiu xa kada-i ñn xa ka kida-i ná io ná jua'an. Ñadu kuechi mee-i kuu xa ña ndaku-i xa kada-i ñn xa kada-i ná io ná jua'an chi daa n-juini mee Ianyuux xa ya'a. Ñatu daa n-ka juini mee ñayiu xi'in xa n-kidava'a-ia xa ya'a. Juini daa kuu vaxi, ko xee kiu ma daa ka ya'a. Jandixa-ro ²¹ xa kada Ianyuux xa ma tiu ka dava'a nga xa tiu vaxi, ni yiki kuñu-ro ma tiu ka chi kada Ianyuux xa ma tiu ka xaxe'e xa ka kuu-ro da'ya-ia. Naka va'a. ²² Ka xini-ro xa nda'u ka ya'a ñayiu xi'in ntdaa ka xa n-xani ini Ianyuux xaxe'e xa tiu ntdaa xa io ñuñayiu. Ná ka ya'a ñadi'i hora kaku da'ya-ña, ka ya'a-i. Ná ka tnana-ña, ka tnana-i. ²³ Ñadu ni xa n-xani ini Ianyuux xi'in dava ka ñayiu nda'u ya'a te ka jan kuechi-i, chi dani roo xa ka kuu-ro ñayiu ki'na ka n-keé ña'a Espíritu Ianyuux, nda'u ka ya'a-ro, te xñu ini-ro xa xee kiu nakueka ña'a Ianyuux. Nadandoto ña'a-ia na ya'a xa kuú-ro, te ma kuú ka-ro. ²⁴ N-kukanu ini-ro xa xandaa xakuiti daa ya'a. Xaxe'e xa ta ya'a ka xijan, dani xñu ini-ro xa ya'a, te ma kande ini-ro. ²⁵ Nux ta jini

ka-ro xa ya'a ñn xa n-kukanu ini-ro xa ya'a, ñu ini na'i-ro xa daa ya'a.

²⁶ Ñatu ka xijan ta'u-ro nuu Ianyuux ná io ná jua'an, ko chindee ña'a Espíritu-ia. Yo kakune'e ña'a-ia hora xijan ta'u-ia nuu Ianyuux, te tñau ini-ia. Ñatu ja'an-ia nuu Taa-ro Ianyuux hora xijan ta'u-ia xa kuu-ro xava'a ná ka xani ini roo chi tuku xijan ta'u-ia. ²⁷ Xini Taa-ro Ianyuux nax xani ini Espíritu-ia, te diuni chinuu-ia janda ka kuu anu-ro. Hora xijan ta'u Espíritu-ia nuu Taa-ro Ianyuux xa kuu-ro xava'a, xijan ta'u-ia nuu-ia xa kada-ia xa xá ñu ini Taa-ro Ianyuux xa kada ña'a-ia.

Nda'u ka ya'a-ro vitna xa xtuu-ro ñuñayiu, ko xee kiu kutuu-ro andiu

²⁸ Roo, ñayiu ka kuva'a anu nuu Ianyuux, juini nda'u ka ya'a-ro a ña tuu nax ka ya'a-ro, ka xini-ro xa nduu-ro ñayiu va'a ka. Ka kuu-ro ñayiu kida-ia xa tekuro tñu'u-ia xa na kua'a nanita'u-ro chi daa n-juini-ia. ²⁹ Ñayiu xa daa nga ñu ini Ianyuux xa nduda'ya ña'a-ia, n-kida-ia xa ka kuu-i da'ya-ia vitna ná kuu Da'ya Yii-ia; xa daa nga n-ñu ini-ia xa kada-ia xijan. Da'ya Yii-ia kuu Ia kunuu ka nuu roo xa ka kuu-ro da'ya-ia tuku. ³⁰ Diuni n-kida Ianyuux xa ka tekuro dava ñayiu tñu'u-ia na kua'a nanita'u-i. Diuni kida-ia xa ñatuka xndido xtau-i kuechi-i, te kada-ia xa nduka'nu-i.

³¹ Xaxe'e xa va'a kida ña'a Ianyuux vaxi, ña tuu nax kuu xa ka kida u'u ña'a ñayiu. ³² Da'ya yii ka-ia ñatu n-kukui'a kuu-ia xa kixi-ia ñuñayiu xa kuú-ia xaxe'e-ro ntdaa-ro. Naka xa kada ña'a-ia kue'e xava'a ku kukui'a kuu-ia. ³³ Na tuu nax kada xa ka ja'an ñayiu nuu Ianyuux xa io kuechi roo, ñayiu n-kaxi ña'a Ianyuux xa ku kuu-ro da'ya-ia

chi na'a-ia xa ñatuka xndido xtau-ro kuechi-ro. ³⁴ Ni mayo ja'an nuu Ianyuux xa io xa chiya'u-ro kuechi-ro chi na'a-ia xa n-xi'í Cristu Jesús xaxe'e kuechi-ro. Ñadu ni xijan n-kida Cristu Jesús chi diuni n-nandoto-ia te nukoo-ia lado kua'a Taa-ro Ianyuux xa taxnuni-ia, te kakune'e ña'a-ia hora xijan ta'u-ia nuu-ia. ³⁵ Xemani ña'a Cristu, te dani ku juemani ña'a-ia, te mayo dada'an. Maxku kani ini-ro xa ñatu xemani ña'a Cristu hora nda'u ka ya'a-ro, a hora ka tnau ini-ro xaxe'e xa ka ya'a-ro ñin xa ka ya'a-ro chi dani kuva'a anu-ia nuu-ro. Ni maxku kani ini-ro xa ñatu xemani ña'a-ia hora ka kida u'u ña'a ñayiu xaxe'e xa kukanu ini-ro-ia, a xa ña tuu nax io xa kaxi xa ko'o-ro, xa kundix kuda'u-ro, a hora xtuu-ro nuu io kuu a nuu ka kuu ñayiu xa ka'ni ña'a-i. ³⁶ Nakaxtna'a xa'a xi'in xa n-ka xia'an ñayiu nuu Ianyuux, te yodotnuni: Xaxe'e-n ntdantu'u kiu ka kuu ñayiu xa ka'ni ña'a-i. Kuenda kiu tkachi xa io xa kuu-ti ka kuu-da. ³⁷ Juini daa ka ya'a-ro, ko ña tuu nax kuu chi kee-ro xava'a xaxe'e xa xemani ña'a-ia. ³⁸ Xandaa xakuiti xemani ña'a Ianyuux, te dani ku juemani ña'a-ia. Xemani ña'a-ia chi n-xi'í Cristu Jesús, Ia kuu Xto'o-ro xaxe'e-ro. Ndito-ro a n-xi'í-ro, ko dani xemani ña'a-ia. Mayo ku dada'an xa ma juemani ña'a-ia. Ni ángel ma dada'an, ni xaloko taxnuni ma dada'an. Ni xa io vitna, ni ñin xa ta koo ka ma kada xa ma juemani ña'a-ia. ³⁹ Ni xa nde'a-ro andiu, ni xa yi'i ka'a ñu'u, ni ñnka xa n-kidava'a-ia io ñuñayiu a io andiu ma ku dada'an xa ma juemani ña'a-ia.

9

N-kaxi Ianyuux ñayiu Israel

1-2 Ja'an ndaa-da; ñatu ja'an vete-da, chi kundu-duu-da xi'in Cristu. Ñatu ja'an vete-da. Xandaa xakuita xa yo vichi kuko'yo ini-da xaxe'e da'ya dana Israel. Nda'u ya'a-da hora naja'an-da-i. Dani ja'an Espíritu Ianyuux nuu-da xa ja'an ndaa-da tuku. ³ Date nuu n-xio xaxe'e xa dandoo ña'a Cristu nanita'u ñayiu ñuu-da xi'in yatnu'u-da, diko kajan ta'u-da nuu Ianyuux xa na dandoo ña'a-ia n-kuu. ⁴ Roo xa ka kuu-ro da'ya dana Israel, ka kuu-ro ñayiu n-kuda'ya ña'a Ianyuux. Xix-itna-ro n-ka kuu ñayiu n-dande'a ña'a Ianyuux mee-ia na n-koko-ia nuu n-ka xo yuku-i. N-kida-ia xi'in-i ñin tratu. N-xia'an-ia ley-ia, te n-ja'an-ia janda kada-i xa ndadaka'nu-i-ia, diuni n-xia'an-ia tnu'u-ia xa taxi-ia ñin xa xá n-taxi-ia roo xa ka kuu-ro da'ya dana Israel. ⁵ Yatnu'u-ro n-ka kuu da'ya yii Israel. Uxi uu-s xa ntdaa-s. Ijan vaxi yatnu'u-ro xi'in Cristu. Kuu-ia Ianyuux te tax-nuni-ia nuu-ro ntdaa-ro xi'in nuu ntdaa xa io. Io xa ndadaka'nu-ro-ia ñikava ñikuita. Amén.

⁶ Ñatuka io xa ku ja'an-ro xa ka kuu na'i dava da'ya dana Israel ñayiu Israel xaxe'e xa ñatu ka kida-i na io xa kada-i. Ñatu ka jandixa-i Ianyuux, ko kida na'i Ianyuux xa n-ja'an-ia xa kada-ia. Xetna'a tnu'u-ia. ⁷ Ñadu ntdaa da'ya dana Abraham n-ja'an Ianyuux xa ku kuu da'ya dana-s chi yodotnuni tnu'u n-ja'an-ia nuu-s: “Diko ni da'ya dana Isaac ku kuu da'ya dana-n.” ⁸ Ña ntdaa ñayiu ka kuu da'ya dana Abraham ka kuu da'ya Ianyuux chi diko ni ñayiu n-ja'an-ia nuu-s xa ku kuu-i da'ya-ia ka kuu da'ya-ia. ⁹ Te diuni n-ja'an Ianyuux nuu Abraham tnu'u ya'a: “Kiu n-xantuu-r xa kixi-r, kixi ntuku-r, te kiu ijan kajan

Sara ñin da'ya yíi.” ¹⁰ Ñadu ni Sara n-xajan da'ya chi diuni n-xajan Rebeca da'ya. Cuati n-xajan-ña, te Isaac n-kuu taa da'ya-ña. ¹¹⁻¹³ Na ta kaku ka cuati ñu'u xiti Rebeca, n-ja'an Ianyuux nuu-ña: “Se juindodo nuu kaku junukuechi nuu se kandijun nga.” Juini ta kada ka-s ñin xava'a a ñin xaloko, xá ama n-ja'an-ia xijan. Diuni yodotnuni: “N-xemani-r Jacob te n-xini u'u-r Esaú.”

Ñayiu kuu ini mee Ianyuux xa kutuu-i xi'in-ia kuu ñayiu kaxí-ia xa kutuu-i xi'in-ia. Ñadu xaxe'e xa va'a ñayiu kaxí-ia-i chi xaxe'e xa xa daa nga ñu ini-ia xa kaxí-ia-i xa kutuu-i xi'in-ia, te kida-ia xa tekui tnu'u-ia xa na kua'a nanita'u-i. ¹⁴ Maxku kachi-ro xa ñatu kida Ianyuux ñin xava'a xaxe'e xa du'a kida-ia. Ni ñin kiu maxku daa kani ini-ro.

¹⁵ N-ja'an-ia nuu Moisés: “Kunda'u ini-r ñayiu kuu ini-r xa kunda'u ini-r. Tnau ini-r xaxe'e-i chi daa kuu ini-r.” ¹⁶ Ñayiu kunda'u ini Ianyuux kaxí-ia xa kutuu-i xi'in-ia. Kaxí Ianyuux ñayiu ijan xaxe'e xa kunda'u ini-ia-i, ñadu xaxe'e xa ka kuu ini ñayiu ijan xa kaxí-ia-i, kaxí-ia-i. Ni ñadu xaxe'e xa ka ndukundee-i xa kaxí ña'a-ia, kaxí-ia-i. ¹⁷ Diuni yodotnuni xa n-ja'an-ia nuu Faraón. Du'a n-ja'an-ia: “N-kida-r xa taxnuni-n te n-kida-n xa n-kida-n na kua'a jini ñayiu ñuñayiu xa kua'a-r kida-r dava'a nga xa ja'an-r xa kada-r, te ja'an koio ñayiu ñuñayiu xa kuu-r Ianyuux ndixa xaxe'e xijan.” ¹⁸ Kundau ini Ianyuux ñayiu kuu ini-ia xa kutuu xi'in-ia xaxe'e xa daa kuu ini-ia, te nux kuu ini-ia xa ku kulilu na'i dava ka ñayiu, dani ku kulilu-i.

¹⁹ Vaa ku ja'an koio-n: “Nux du'a io ¿nakuenda ja'an-ia xa io kuechi ñayiu ka kida kuechi? Kida

Ianyuux xa kuu ini mee-ia xa kada-ia, te mayo ku dada'an.”²⁰ ¡Nuda xijan ku ja'an ndixi! Maxku yoo ñayiu ku ja'an xa nuu io va'a xa kida-ia a ñatu io va'a. Ñatu ja'an ñin kidi nuu se n-kidava'a: “¡Nuda du'a kaa n-kidava'a ña'a-n u!”²¹ Kidava'a ñin se kidava'a kidi ñu'u kidi kuu ini mee-s. Idii ni nde'yu kidava'a-s kidi va'a kaa xi'in kidi nda'u kaa.²² Kiti ini Ianyuux nuu ñayiu ñatu n-ka natu ini xa n-ka kida-i kuechi. Xaxe'e xijan io xa naa-i. Ñatu n-xo kida u'u ni-ia-i chi n-xo xo ndetu kuee-ia xaxe'e xa n-juini-ia xa na natu ini-i xa n-ka kida-i kuechi. Kada u'u-ia-i na kua'a na jini koio-i xa kiti ini-ia nuu-i. Diuni juini-ia xa jini ntdaa ñayiu xa taxnuni-ia nuu-i.²³ N-xo ndetu kuee-ia chi diuni n-juini-ia xa natu ini roo, ñayiu n-kunda'u ini-ia xa n-ka kida-ro kuechi xaxe'e xa n-juini-ia xa jini-ro xa kada-ia xa nduka'nu koio-ro nuu tuu-ia. Diuni n-kidatniu-ia anu-ro xa n-ka nduu-ro ñayiu va'a.²⁴ Ñadu ni roo xa ka kuu-ro ñayiu Israel n-kida-ia xa tekuro tnu'u-ia xa na kua'a nanita'u koio-ro, chi diuni n-kida-ia xa tekuro ñayiu ñatu kuu ñayiu Israel tnu'u-ia.²⁵ Nani ja'an-da ya, dani n-ja'an Ianyuux nuu Oseas, te n-chidotnuni-s:

Ñayiu ñatu n-ka kuu da'ya-r kuu da'ya-r vitna.

Ñayiu ña n-xo xemani-r, xemani-r vitna.

²⁶ Ñayiu n-xo ja'an-r nuu-i:

“Ñatu ka kuu-n da'ya-r.”

Ñayiu ijan ku kuu da'ya-r xa kuu-r Ianyuux ndixa, te ndito-r.

²⁷ Du'a n-ja'an se n-xo nani Isaías te n-chidotnuni-s: “Kue'e da'ya dana Israel io ná kue'e ñu'u kuchi io yu'u mar. Kue'e-i io, ko xaku ni-i nanita'u.”²⁸ Vax kuyatni kiu kada Ianyuux xa

jɨn tna'a xa n-ja'an-ia nuu ñayiu ñuñayiu". ²⁹ Dɨuni n-ja'an Isaías te chidotnuni-s:
 Nuú ña n-dakaku Ianyuux dava da'ya dana Israel,
 ma koo koio-da n-kuu ná ñayo ka da'ya dana ñayiu
 Sodoma xi'in da'ya dana ñayiu Gomorra io.

Ñatu n-ka kukanu ini dava ñayiu Israel Jesucristu

³⁰ Xaxe'e xa ka kukanu ini ñayiu Cristu, ñatuka xndido xtau-i kuechi n-ka kida-i, juini ñatu n-ka xo kuu anu-i xa jandixa-i Ianyuux.

³¹ N-ka kuu ñayiu Israel xa jandixa ndi'i-i ley Ianyuux xa ma kundido kutau ka-i kuechi n-ka kida-i, ko ñatu n-ka ndaku-i. ³² N-ka kuu-i xa ndaku-i xa jandixa koio-i ley Ianyuux na kua'a maxku kundido kutau ka-i kuechi n-ka kida-i, ko ña yoo-i ndaku xaxe'e xa ñatu n-ka kukanu ini-i Ianyuux. Kuenda kɨu ñayiu nde'e ka xe ki'i yuú hora xndijun-i inka ñayiu, ka kuu-i xa ñatu jandixa-i-ia. ³³ Dɨuni yodotnuni tnu'u Ianyuux:

Kuna'a koio xa tunda'a-r Ia xee Sión.

Kada-ia ñin xa ta uun ka jini ñayiu dian.

Te xaxe'e xijan ma jandixa ña'a ka-i.

Kuenda kɨu ñin yuú a ñin toto katuu,

te ka xe ki'i ñayiu te ka ndua-i ku kuu-ia.

Kuenda kɨu ñayiu nde'e ka xe ki'i yuú hora xndijun-i inka ñayiu ku kuu ñayiu ma kukanu ini ña'a,

ko ñayiu kukanu ini ña'a,

ma jɨn ki'i-i, ni ma uun kujanuu-i xa kukanu ini-i-ia.

10

¹ Yo xijan ta'u-da nuu Ianyuux xa nanita'u koio ñayiu ka kuu da'ya dana Israel. Yo kuu

anu-da xa nanita'u koio-i. ² Ka kuu anu-i xa junukuechi-i nuu Ianyuux, ko ñatu ka xini-i janda io xa junukuechi-i nuu-ia. ³ Ñayo-i n-kutnuni ini janda kada-i xa ma kundido kutau ka-i kuechi n-ka kida-i. Ka ndukundee-i xa ma kundido kutau ka-i kuechi n-ka kida-i, ko tuku ka kida-i, te tuku juini Ianyuux. Xaxe'e xijan dani xndido xtau-i kuechi n-ka kida-i. ⁴ Ñatu ka xini-i xa Cristu kuu Ia n-jandixa ntdanditu'u ley Ianyuux n-chidotnuni Moisés xa na kua'a maxku kundido kutau ka roo, ñayiu ka kukanu ini-ia kuechi n-ka kida-ro.

⁵ Na n-ja'an Moisés nax kada ñayiu xa maxku kundido kutau ka-i kuechi n-ka kida-i, n-kakune'e-s ley Ianyuux, te n-chidotnuni-s: “Ñayiu jandixa ley-ia, kutuu-i xi'in-ia nıkava nıkuita.” ⁶ Roo xa ka kuu-ro ñayiu n-kida Ianyuux xa ñatuka xndido xtau-ro kuechi n-ka kida-ro xaxe'e xa kukanu ini-ro Cristu, ñatu ka ja'an-ro ná ja'an dava ñayiu: “Na nkaa-ro andiu.” Ñayiu daa ja'an kuu ñayiu kuu xa jin june'e-i Cristu. ⁷ Ni ñatu ka ja'an-ro ná ka ja'an dava ñayiu: “Na keé-ro nua ña xe ndi'i.” Ñayiu daa ja'an kuu ñayiu kuu xa natava-i Cristu nuu ka xani ini-i xa n-xe konduxi-ia. ⁸ Ñatu ka xini-ro xa daa ku ja'an-ro chi ka dakua'a tna'a-ro xa n-chidotnuni Moisés. Du'a n-chidotnuni-s: “Xá n-kixee Tnu'u Ianyuux. Xá ka tekuro. Xá ka xini-ro. Xá ka xko ja'an-ro xa n-ja'an-ia nuu ñayiu.” Xijan n-chidotnuni-s. Xa ka ja'an-ro nuu-i kuu xa io xa kukanu ini-i Cristu.

⁹ Nuxa xandaa xakuita ka jandixa-ro xa n-nadandoto Ianyuux Jesús, te nux ka ja'an-ro nuu ñayiu xa Jesús kuu Ianyuux, nanita'u-ro.

¹⁰ Xaxe'e xa kukanu ini-ro Jesús, ma kundido

kutau ka-ro kuechi n-ka kida-ro, te nanita'u-ro xaxe'e xa ja'an-ro nuu ñayiu xa kuu-ia Ianyuux. ¹¹ Yodotnuni tnu'u Ianyuux: “Ma uun ja'an ñayiu kukanu ini-i-ia xa n-danda'u ña'a-ia.” ¹² Nani kuda'ya Ianyuux ñayiu Israel ka xijan ta'u nuu-ia, dani kuda'ya-ia ñayiu ñatu ka kuu ñayiu Israel ka xijan ta'u nuu-ia. Ntdaa-i kuu da'ya-ia. Yo va'a kida ña'a-ia ntdaa-ro. ¹³ Ntdaa ñayiu ka xijan ta'u nuu Ianyuux nanita'u.

¹⁴ Ka xijan ta'u ñayiu ijan nuu-ia, ko ñayiu ta kukanu ini ka-ia, ñatu ka xini-i xa kajan ta'u-i nuu-ia. Xaxe'e xa ta teku ka-i jundu kuu Cristu ñatu kuu xa kukanu ini-i-ia. Nux mayo dakua'a ñayiu ijan xa n-ja'an Ianyuux, ma kuu xa teku-i tnu'u-ia. ¹⁵ Nux mayo tunda'a ñayiu dakua'a ñayiu ijan, mayo dakua'a-i. Du'a yodotnuni: “Naka ka kudi ini-ro xaxe'e xa n-ka kixee ñayiu ka ja'an nuu-ro xa n-ja'an Ianyuux.”

¹⁶ Juuni ka dakua'a-ro ñayiu xa n-ja'an Ianyuux, ko ñadu ntdaa-i jandixa xa ñn xandaa kuu xa ka teku-i. Du'a n-ja'an Isaías nuu Ianyuux. Xia'an-s: “Taa-ro Ianyuux, xaku ni ñayiu jandixa xa ñn xandaa kuu xa ja'an-da nuu-i”, kuu Isaías, xia'an-s. ¹⁷ Ndoñu'u xa teku-i xa n-ja'an Cristu na kua'a na kukanu ini-i-ia. Kakune'e-ro Cristu hora ka dakua'a-ro-i. ¹⁸ Maxku ku ja'an-ro xa ñatu n-ka teku ñayiu jan xa n-ka ja'an-ro, chi n-ka teku-i. Diuni du'a yodotnuni tnu'u Ianyuux:

Ntdantu'u ñuu io ñuñayiu n-ka teku ñayiu nax kuu xa n-ja'an Ianyuux.

Nde diki ñuñayiu xi'in nde xe'e ñuñayiu ka xini ñayiu nax n-kida-ia.

19 Na ja'an ntuku-da, “Ñadu xa ña n-ka tekú ñayiu Israel tnu'u-ia chi n-ka tekú-i.” Moisés kuu se ki'na nuu n-kakune'e xa'a, te n-chidotnuni-s xa n-ja'an Ianyuux nuu ñayiu Israel. N-ja'an-ia:

Kada-r xa ñayiu ña tuu na nación io kada xa kukuedi ini koio-n.

Kada-r xa ñayiu ñatu xe ini tnu'u ja'an-r dakiti ini ña'a.

20 N-tekú Isaías xa n-ja'an Ianyuux, te n-kuyii-s xa n-chidotnuni-s. Du'a n-ja'an-ia:

Ñayiu ñatu n-ka xo xini jundu kuu-r, ka xini-i jundu kuu-r vitna.

Ñayiu ñatu n-ka xijan tnu'u jundu kuu-r, dakua'a-r-yi, te ka xini-i jundu kuu-r vitna.

21 N-kakune'e-ia ñayiu Israel na n-ja'an-ia: “Nt-daa kiu xko ja'an-r nuu ñayiu xa na jandixa ña'a-i, ko ñayo-i ka juini. Unu xe ini-i.”

11

N-kaxi Ianyuux dava ñayiu Israel xa ku kuda'ya-ia-i

¹ Ni ñn kiu maxku kani ini-ro xa n-dandoo Ianyuux ñayiu Israel, ñayiu n-xo ndeka-ia, juini n-ka kuxe ini-i nuu-ia. Ñatu n-dandoo-ia-i chi ñatu n-dandoo ña'a-ia dañá. Da'ya dana Abraham ka kuu ñayiu Israel, te da'ya dana-s kuu-da tuku. Kuu-da da'ya dana Benjamín. ² Ñatu n-dandoo Ianyuux ñayiu Israel xaxe'e xa na'a n-kuu n-kaxi-ia-i xa ku kuu-i da'ya-ia. ¿Ñatu ka xini-n nax kuu xa n-kakune'e Elías, se n-xo ja'an xa n-ja'an Ianyuux nuu ñayiu na n-ja'an-s nuu-ia xa n-ka kida ñayiu Israel kuechi a? ³ Du'a n-ja'an-s nuu-ia, te n-chidotnuni-s: “Taa-ro Ianyuux, n-ka

xa'ni ñayiu ya'a ntdaa se n-ka xo ja'an nuu-i xa n-ja'an-n. Mee dii nga-da n-ndoo, te ka nduku ña'a-i xa ka'ni ña'a-i tuku. Diuni n-ka xanu-i al-tari-n", kuu-s, xia'an-s. ⁴ ¿Ñatu xna'a-n nax n-ja'an Ianyuux nuu-s a? N-ja'an-ia nuu-s: "N-dada'an-r xa dandoo ña'a uxa mil ñayiu, te ñayiu ijan ñatu n-ka xe juiin xiti nuu xa nani Baal xa ndadaka'nu koio-i xijan", kuu-ia, n-xia'an-ia nuu-s. ⁵ Nani n-kuu xa n-kaxi Ianyuux dava ñayiu Israel na n-xo tuu Elías, daa kuu vitna xa n-kaxi-ia dava ñayiu ku kuu da'ya-ia xaxe'e xa kunda'u ini-ia-i. ⁶ N-kaxi ña'a-ia xa ku kuu-ro da'ya-ia, ko ñadu xaxe'e xa n-ka kida-ro xava'a. N-kaxi ña'a-ia xaxe'e xa kunda'u ini ña'a-ia. Date nuu n-xio xaxe'e xa n-ka kida-ro xava'a kaxí ña'a-ia xa ku kuu-ro da'ya-ia, ma kuu xa kaxí ña'a-ia xaxe'e xa kunda'u ini ña'a-ia n-kuu. ⁷ N-ka kuu ñayiu Israel xa jandixa ndi'i-i ley Ianyuux xa maxku kundido kutau ka-i kuechi n-ka kida-i, ko ña ndaku-i. Diko ni ñayiu n-kaxi Ianyuux xa ku kuu-i da'ya-ia ma kundido kutau ka-i kuechi n-ka kida-i. Dava ka ñayiu, ka kuxe ini ka-i nuu-ia jua'an. ⁸ Du'a yodotnuni: N-kida Ianyuux xa n-ka ndulilu-i xa maxku kut-nuni ini-i xa ja'an-ia.

Juini xnde'a-i iin xa xnde'a-i, ko ñatu ka xini-i nax kuu.

Juini ka tekui-i iin xa ka tekui-i, ko ñayo-i ka kutnuni ini nax kuu xijan.

Daa ka kuu-i vaxi.

⁹ Diuni n-kakune'e David ñayiu ya'a, te n-chidotnuni-s:

Na kada u'u ña'a ndeyu ka xaxi ka xi'i-i.

Maxku tna'a ña'a xa ka xaxi-i.

Nda'u na ya'a koio-i. Xijan kuu ta'u-i.

¹⁰ Na kuua-i. Maxku kunde'a ka-i.
Na nduti'i yata-i te maxku ndundaa ka.

Nanita'u ñayiu ka kukanu ini Jesucristu ñatu ka kuu ñayiu Israel

¹¹ Ñadu xaxe'e xa xaku ni ñayiu Israel ka jandixa lanyuux vitna, te dani xaku ni-i jandixa-ia vaxi, chi xee kiu jandixa ntdaa-i-ia. Nax kuu ña'a. Xaxe'e xa ñatu ka jandixa da'ya dana Israel-ia, xijan kuu xa n-ka kukanu ini ñayiu ñatu ka kuu da'ya dana Israel-ia. Ijan te n-ka kukuedi ini da'ya dana-s. ¹² Nu xaxe'e xa n-ka kida da'ya dana Israel kuechi kida lanyuux ñayiu ñuñayiu xava'a, naka ñayiu ñuñayiu ma ku kada-ia-i xava'a na xee kiu kukanu ini da'ya dana-s Cristu. Nu xaxe'e xa n-ka dandoo da'ya dana-s-ia kuu ñayiu ñatu kuu da'ya dana-s xava'a, naka ñayiu ñatu ka kuu da'ya dana-s ma ku kada-ia-i xava'a na xee kiu kukanu ini da'ya dana-s Cristu. Vichi va'a ku kada-ia-i.

¹³ Kachitnu'u ña'a-da ndixi, ñayiu ñatu ka kuu da'ya dana Israel xa n-tunda'a ña'a lanyuux xa dakua'a ña'a-da. Xijan kuu tniu n-taxi-ia, tniu ndandi'i kuu. ¹⁴ Dakua'a ña'a-da, ndixi ñayiu ñatu kuu da'ya dana Israel na kua'a kukuedi ini ñayiu ñuu-da xi'in yatnu'u-da na kua'a kue'e-i na nanita'u. ¹⁵ Xaxe'e xa n-xika yata lanyuux nuu ñayiu ñuu-da xi'in yatnu'u-da n-ndumani-ia xi'in kue'e ñayiu ñuñayiu. Kuenda kiu ndiyi ka kuu ñayiu Israel, ko kiu na ndumani lanyuux xi'in-i kuenda kiu nandoto koio-i. ¹⁶ Ná kuu yuxa ka kuu ñayiu Israel. Nux ii ñn parti yuxa n-doko ñn ñadi'i nuu lanyuux, diuni ii ñnka parti yuxa jan. Nux ii yo'o yutnu, diuni ii ntakaa da'nda-tnu.

17 Diuni ka kuu ñayiu Israel ná ka kuu da'nda tnu olivo xetata-ro, te ndixi, ñayiu ñatu ka kuu ñayiu Israel, ka kuu-n ná ka kuu da'nda tnu olivo io yuku. N-xa'nde Ianyuux da'nda tnu olivo xetata-ro, te n-xa'nde-ia ñin da'nda tnu olivo io yuku, te n-kida injertari-ia da'nda yutnu ijan tnu olivo xetata-ro jan. ñin nga yo'o-tnu ne'e nduu da'nda-tnu jan. ñin ni ndute yi'i-tnu.

18 Mee-n, ñayiu Israel, maxku ja'an i'ni koio-n xa ka kuu-n ná ka kuu da'nda tnu olivo xetata-ro, chi xa xna'a-n xa ñadu da'nda-tnu ne'e-tnu xa nukoo-tnu chi yo'o-tnu ne'e ña'a.

19 Te ndixi, ñayiu ñatu ka kuu ñayiu Israel, vaa ku ja'an koio-n: “N-ta'nde da'nda tnu olivo xetata-ro xa na kua'a na kada injertari Ianyuux da'nda tnu olivo io yuku nuu n-ta'nde tnu jan.”

20 N-xika yata Ianyuux nuu ñayiu ka kuu da'ya dana Israel xaxe'e xa ñatu n-ka kukanu ini-i-ia, te ndixi ka kunduu-n xi'in Ianyuux xaxe'e xa ka kukanu ini-n-ia. Ko maxku ku ku i'ni-n xaxe'e xijan; koo koio-n cuedado na ña'a daa ya'a koio-n tuku.

21 Nux n-xika yata Ianyuux nuu ñayiu ka kuu ná ka kuu da'nda tnu olivo xetata-ro, naka nuu ndixi ma ku kaka yata-ia. 22 Xá xna'a-n janda kuu Ianyuux. Xá xna'a-n xa vichi va'a kida-ia dava ñayiu chi kue'e xa xia'an-ia-i, te xtuu vii xtuu va'a-i. Diuni ka xini-n xa kida-ia xa nda'u ya'a dava ñayiu. Kunda'u ini ña'a-ia, ndixi, te kida-ia xa nda'u ka ya'a ñayiu n-ka xika yata nuu-ia. Kada na'i koio-n xava'a na kua'a dani na kada ña'a-ia xava'a. Nux ña'a, dani kaka yata-ia nuu-n tuku. 23 Kuenda kiu da'nda tnu olivo xetata-ro n-ta'nde jan ka kuu da'ya dana Israel. Ndada injertari ntuku Ianyuux

da'nda tnu olivo n-ta'nde jan nux na ndixe'e koio da'ya dana Israel xa kukanu ini-i Ianyuux inka vuelta. Daa kuu chi kada-ia xa kiu tna'a koio-i nuu-n xa ka kuu-n ñayiu ka kukanu ini Jesucristu. ²⁴ Nux n-kida injertari-ia da'nda tnu olivo io yuku nuu tnu olivo xetata-ro, naka da'nda tnu olivo xetata-ro, ma ndada injertari-ia mee tnu olivo jan.

Nanita'u ntdaa da'ya dana Israel io xa nanita'u

²⁵ Na kachitnu'u ña'a-da nax xani ini Ianyuux xa koo xa na kua'a na jini koio-n nax ya'a te nax koo, chi nux ma kachitnu'u ña'a-da, vaa ku ja'an koio-n xa xá ka xini-n nax ya'a, te ku ku i'ni-n. Xa'a kuu xa kachitnu'u ña'a-da. Kue'e ñayiu Israel ñatu ka juini xa kukanu ini-i Jesucristu. Nde kiu na kukanu ini ndi'i ñayiu ñatu ka kuu ñayiu Israel io xa kiu tna'a nuu ñayiu kukanu ini-ia Cristu, ijan dada ndixe'e ñayiu Israel xa kukanu ini ntuku-i Ianyuux. ²⁶ Xee kiu nanita'u ntdaa da'ya dana Israel io xa nanita'u chi daa yodotnuni. Du'a yodotnuni: Sión kee Ia dakaku kue'e ñayiu ka kuu da'ya dana Jacob.

Kada-ia xa ma kada koio ka ñayiu ka kuu da'ya dana-s kuechi n-ka xo kida-i. N-ka xo kida-i kuechi chi ñatuka n-ka xo jandixa-i Ianyuux.

²⁷ N-ja'an Ianyuux:

“N-ja'an-r xa kada-r xa ma kundido kutau ka-i kuechi n-ka kida-i, te daa kada-r.”

²⁸ Xaxe'e xa kue'e da'ya dana Israel n-xika yata nuu Ianyuux, kiti ini-ia nuu-i. Te xaxe'e xijan va'a kida ña'a-ia ndixi, ñayiu ñatu ka kuu ñayiu Israel. Juini kue'e-i n-ka xika yata nuu-ia, ko dani xemani-ia ñayiu Israel xaxe'e uxi uu da'ya y# Israel

chi n-kaxi-ia-i xa kutuu-i nuu tuu-ia. ²⁹ Juña'a na'i-ia xa n-ja'an-ia xa juña'a-ia chi xetna'a xa ja'an-ia. Kida-ia xa tekú ñayiu tnu'u-ia xa na kua'a nanita'u-i ná n-ja'an-ia. ³⁰ N-ka xo kuxe ini-n nuu Ianyuux, te vitna ka kuxe ini da'ya dana Israel nuu-ia. Xaxe'e xa ka kuxe ini-i nuu-ia kundau ini ña'a-ia ndixi. ³¹ Ka kuxe ini ñayiu Israel nuu-ia vitna, ko ndunda'u ini-ia-i na xee kiu. Xaxe'e xa kunda'u ini ña'a-ia ndixi, ndunda'u ini-ia-i tuku. ³² Nani ka kuxe ini ñayiu Israel nuu Ianyuux dani ka kuxe ini ñayiu ñatu kuu ñayiu Israel nuu-ia. N-xio xa nda'u ya'a ntdaa-ro na kuú-ro n-kuu, ko xaxe'e xa kunda'u ini ña'a-ia, ma kuu ka xa nda'u ya'a-ro.

³³ Naka kue'e xa taxi Ianyuux. Naka vichi kunda'u ini ña'a-ia. Naka kue'e xa kutnuni ini-ia. Naka kue'e xa xini-ia. Naka tu'a-ia. Ñayo-ro xini nakuenda kida-ia ñn xa kida-ia, ni nakuenda daa xani ini-ia. Ñayo-ro xini naxa xani ini-ia xa kada-ia. ³⁴ Ná ja'an-da ya, daa yodotnuni:

Ñayo-ro xini nax xani ini-ia.

Ñatu xe tnu'u-ia nuu ñayiu.

³⁵ Ñayo-ro xia'an nga ñn xa xia'an nga-ro-ia.

Ña tuu nax kuta'u-ia nuu-ro.

Ña tuu nax n-xia'an nga-ro-ia xa kutau-ia nuu-ro.

³⁶ Mee-ia n-xani ini ntdaa xa io, te xaxii mee-ia kuu. N-kidava'a-ia ntdaa xa io xa na kua'a na najuen tnu'u ña'a xijan. Io xa ndadaka'nu-ro-ia. Ndi'kiu ndi'ñuu nduka'nu-ia te ma jin ndi'i. Amén.

12

Kuenda kiu doko-ro mee-ro nuu Ianyuux xa xikuechi-ro nuu-ia

¹ Ta'u tniu-da nuu-n ntdaa-n xa junukuechi koio-n nuu Ianyuux chi kunda'u ini ña'a-ia. Kuenda kiu doko-n mee-n nuu-ia xa junukuechi koio-n nuu-ia chi vichi va'a n-kida ña'a-ia. Kuvete-ia xa daa kada-n. Ñatuka ka kuu-ro ná kuu dava'a nga ñayiu chi xinokuechi-ro nuu Ianyuux. Xaxe'e xa daa kida ña'a-ia, io xa kada-ro ntdaa-ro xijan. ² Maxku ku kuu ka anu-n xa kada koio-n xaloko. Maxku kada koio-n ná ka kida ñayiu ñatu ka xini jundu kuu Ianyuux. Ni maxku kukajan ini-n mee ni xa io ñuñayiu ya'a. Juejoon koio-n xa na kadatniu ka Ianyuux anu-n xa maxku ku kuu ka-n ná n-ka xo kuu-n. Juejoon koio-n xa na kadatniu ka-ia anu-n na kua'a na kani ini-n ná xani ini-ia te jini koio-n nax ñu ini-ia xa kada-ro. Xa ñu ini-ia xa kada-ro kuu xa kada-ro xava'a xi'in xa nduu-ro ñayiu kida mee ni xava'a. Tna ini-ia xijan.

³ Na ja'an-da nuu-n xa maxku ku ku i'ni-n xa yo va'a ka tu'a-n nux ña tuu nga ka tu'a-n. Nux ka xinokuechi-n nuu Ianyuux, maxku ku ku i'ni koio-n xa yo va'a xinokuechi-n nuu-ia. Nux va'a ka kukanu ini koio-n-ia, maxku ku ku i'ni-n xa va'a ka tu'a-n a va'a ka xinokuechi-n. Xaxe'e xa n-tetutniu ña'a-ia xa du'a ja'an-da nuu-n, du'a ja'an-da. ⁴ Na ja'an-da tnu'u kandee ya'a nuu-n. Io nda'a-ro. Io nuu-ro. Io xiti-ro. Io diki-ro, io xe'e-ro du, te nudin nudin xetniu-ro ntdaa, ko in ni xa ka kuu. ⁵ Ná ka kuu xijan ka kuu ñayiu ka kukanu ini Cristu chi idii nga ñayiu ka kuu-i. Ná ndoñu'u-ro nda'a-ro, xe'e-ro, diki-ro, daa ndoñu'u tna'a ñayiu ka kukanu ini Cristu. ⁶ Ntdaa-ro tu'a kada-ro tniu Ianyuux. N-xani ini-ia xa nudin tniu kada-ro. Naka va'a-ia xa daa n-kidava'a

ña'a-ia. Ndeda-ro vaxi xa ja'an-ro nuu ñayiu xa n-ja'an Ianyuux, na ja'an-ro xijan. Nux va'a ka kukanu ini-ro Cristu, ndaku-ro xa va'a ja'an-ro nuu ñayiu xa n-ja'an-ia. ⁷ Te ndeda-ro vaxi xa junukuechi-ro nuu ñayiu ka kukanu ini Cristu, daa na kada-ro. Ndeda-ro vaxi xa dakua'a-ro ñayiu, na dakua'a-ro-i. ⁸ Ndeda-ro vaxi xa jan do'o-ro ñayiu, daa na kada-ro. Ndeda-ro vaxi xa juña'a nga-ro ñayiu ka kunda'u dava xa xneva'a-ro, kue'e na juña'a nga-ro-i. Ndeda-ro vaxi xa taxnuni-ro, va'a na taxnuni-ro. Nux vaxi-ro xa chindee-ro ñayiu xaxe'e xa nda'u ini-ro, na chindee-ro-i, te maxku kava uu kava uni anu-ro.

Io xa juemani tna'a ñayiu ka kukanu ini Jesu-cristu

⁹ Xandaa xakuiti juemani tna'a-n; maxku kada nga-n. Jun ini koio-n xa kada-n xava'a. Dandoo koio-n xaloko xadu'a. ¹⁰ Juemani tna'a-n xi'in dava ka ñayiu ka kukanu ini Cristu chi kuenda kiu ñani-n ka kutna'a. Najuen tnu'u tna'a koio-n. ¹¹ Maxku kava uu kava uni anu-n hora kida-n tniu-ia. Na ku kuva'a anu-n nuu tniu Cristu. Xi'in nde yiki nde tuchi-n junukuechi-n nuu-ia. ¹² Io xa ku kuvete koio-n chi n-ka kukanu ini-n xa dananita'u ña'a Ianyuux. Hora na kada u'u ña'a ñayiu, kada nde ini koio-n. Ku kajan ta'u kutu koio-n nuu-ia, te maxku kande ini-n. ¹³ Chindee-n ñayiu ka kunda'u n-kida Ianyuux xa n-ka nduu-i ñayiu ii. Kotondee koio-n-yi, te juña'a koio-n-yi ve'e-n na ndoo-i nux ña vada ndoo-i. ¹⁴ Kajan ta'u koio-n nuu Ianyuux xa na kuu ñayiu ka kida u'u ña'a xava'a, te maxku kui'a ja'an-n-yi. ¹⁵ Hora na kudi ini ñayiu, kudi ini koio-n; hora na nda'i ñayiu,

nda'i koio-n. ¹⁶ Kutuu mani koio-n xi'in dava ka ñayiu. Maxku ku kuxe ini koio-n. Tu'a tna'a koio-n xi'in ñayiu ka kunda'u ka kukee. Maxku ku ja'an koio-n xa ntdanditu'u xa kua'a-n kada-n. ¹⁷ Nux n-janña'a ñin ñayiu a nax n-kida ña'a-i maxku ña'a dandena-n. Kada-n ntdaa xa ka xani ini ñayiu xa kuu xava'a. ¹⁸ Maxku ku jantna'a-n xi'in ñayiu nuu ka xikonuu ka xikondodo-n. Ntdaa-i kutuu mani-n xi'in-i, jun ini-n xa maxku jantna'a-n xi'in-i. ¹⁹ Maxku daa mee ka-n ku kada u'u ñayiu ka kida u'u ña'a. Ianyuux io xa kada u'u ñayiu ijan, ñadu mee-n chi du'a yodotnuni: “Mee-r io xa kada u'u-r ñayiu. Mee-r juña'a ta'u-i.” ²⁰ Diuni yodotnuni: “Nux kojón ñayiu xini u'u ña'a, juña'a-n xa kaxi-i. Nux ka yichi-i ndute, juña'a-n ndute na ko'o-i. Juña'a koio-n xa kaxi xa ko'o-i na kua'a na kujanuu-i.” ²¹ Naa xa kada u'u-n ñayiu n-ka kida u'u ña'a, juña'a-n xa ka ndoñu'u-i. Naa xa dandena-n xa n-kida ña'a ñin ñayiu, kada-n-yi xava'a.

13

Io xa jueyu'u juendetu-ro nuu se ka taxnuni nuu-ro

¹ Jueyu'u juendetu koio-n nuu se ka taxnuni nuu-n. Ianyuux kuu Ia n-xani ini xa koo se taxnuni nuu-ro. Xnetniu-s chi mee Ianyuux kida xa ka tetutniu ña'a ñuu. ² Ñayiu ndandita nuu se ka taxnuni, io kuechi-i chi ndandita-i nuu se n-kida Ianyuux xa n-tetutniu ña'a ñayiu. Kada u'u se ka taxnuni ñayiu ka ndandita nuu-s. ³ Ñayiu ña tuu nax ka kida ñatu ka yu'u nuu se ka taxnuni chi ña tuu nax ka kida-i. Ñayiu ka kida xaloko ka kuu ñayiu ka yu'u nuu-s. Xa maxku ku yu'u-ro nuu se

ka taxnuni nuu-ro, na kada-ro xava'a na kua'a na najuen tnu'u ña'a koio-s. ⁴ N-kida lanyuux xa koo se taxnuni xa na kua'a na kutuu va'a-ro. Nux na kada-n xaloko yu'u koio-n nuu-s, chi ka kida u'u-s ñayiu loko. Kiti ini-s nuu ñayiu ka kida xaloko, te daya'a-s-yi juxtixia. Xaxe'e xa xinokuechi-s nuu lanyuux, daa kida-s. ⁵ Jueyu'u juendetu koio-n nuu koio-s, ko ñadu xa na ña'a daya'a ña'a-s juxtixia. Jueyu'u juendetu koio-n nuu koio-s xaxe'e xa daa io xa kada-ro. ⁶ Xaxe'e xa ka kida-s tniu ijan ka xia'an-ro tvini ka ndajan-s. Ka xinokuechi-s nuu lanyuux xa daa ka kida-s. ⁷ Juña'a koio-n ntaka tvini ka ndajan se ka taxnuni. Diuni juña'a koio-n tvini ka xijan-s. Ja'an koio-n, “Dito” nuu se io xa ja'an-ro “Dito.” Najuen tnu'u koio-n se io xa najuen tnu'u-ro-s. Du'a kada koio-n. ⁸ Io xa najuña'a-n xa tau-n nuu ñayiu. Diuni io xa juemani tna'a-n. Nux xemani tna'a ñayiu, jandixa-i dava ka ley lanyuux tuku. ⁹ Yodotnuni: “Maxku kava-n xi'in ñadi'i ñatu kuu ñadi'i-n. Maxku ka'ni-n ndiyi. Maxku du'u-n. Maxku kukajan ini-n xaxii ñayiu.” Nux jandixa-ro ley ya'a, ndaku koio-ro xa jandixa koio-ro dava ka ley lanyuux: “Io xa juemani-n ñanitna'a-n ná xemani-n mee-n.” ¹⁰ Nux xandaa xakuita xemani-n ñanitna'a-n, ña tuu nax kada-n-yi. Kida-ro xa ja'an ley lanyuux nux xemani-ro ñayiu.

¹¹ Maxku ku kidi-n chi xa ka xini-n na tiempo tuu-ro. Xa vax kuyatni xa nanita'u-ro. Na'a ka n-kuu xndetu-ro vaxi dada xa kundetu-ro. ¹² Kuenda kiu xa n-tuu yaa te vax kuyatni xa xino ngandii xa vax kuyatni tiempo nanita'u-ro. Xijan kuu xa maxku kada ka-ro xaloko ka kida ñayiu

loko xakuua. Mee nga xava'a na ku kada-ro ná ka kida ñayiu va'a nduu. Na kada-ro xa juini Ianyuux. Xava'a ka kida ñayiu nduu kuu ná kuu armadura soldado. ¹³ Na ku kuñukax ini-ro nuu xikonuu xikondodo-ro; na kuikonuu-ro ná kida ñayiu va'a xikonuu nduu. Maxku nde'e kaxi-ro hora xe'en-ro viko, ni maxku yo ku ji'in-ro viko, ni maxku ko'o-ro xa nde xini-ro. Maxku kada-ro kuechi xi'in ñadi'i ñatu kuu ñadi'i-ro, ni maxku mee ni xa ku kada-n kuechi ku jun ini-n. Maxku jantna'a koio-ro, ni maxku ku kuu-ro ñayiu kuedi ini. ¹⁴ Maxku daa kada koio-n. Jun ini koio-n xa kada-n xa juini Jesucristu, Ia kuu Xto'o-ro. Maxku ku kuu ka anu-n xa kada-n xaloko ka kida ñayiu loko.

14

Maxku ku jan tnu'u-ro dava ka ñayiu kukanu ini Jesús tuku ka kida

¹ Io xa ku kuu ini va'a-n nuu ñayiu ñatu ka kida ná ka kida-n nux ka xani ini-i xa ñatu io va'a xa ka kida-n. Io xa ku kuu ini va'a-n nuu-i chi ñayo-ro ka xini ndaa ka xini kuiti nux vatuka xa kada-ro xa ka kida-ro a ña'a. Maxku jan tnu'u-n-yi. ² Io-n ka xani ini xa io va'a xa kaxi-ro dava'a nga xa kaxi-ro, ko io-n ka xani ini xa ñatu io va'a xa kaxi-ro kuñu. ³ Ñayiu ka xaxi dava'a nga xa ka xaxi-i, maxku kui'a ja'an-i ñayiu ka xani ini xa ñatu io va'a xa kaxi-ro dava'a nga xa kaxi-ro. Ñayiu ka xani ini xa ñatu tna ini Ianyuux xa kaxi-ro dava'a nga xa io, maxku jan tnu'u-i ñayiu ka xani ini xa io va'a xa kaxi-ro dava'a nga xa io xa kaxi-ro, chi ntdaa-i ka kuu da'ya Ianyuux. ⁴ Ñatu io va'a xa

jan tnu'u-ro ñayiu chi ñadu roo io xa chinuu nax ka kida-i chi ñadu nuu mee-ro xinokuechi-i. Mee Ianyuux taxnuni nuu-i te xini-ia nax ka kida-i. Kendoo va'a xa ka kida-i chi mee-ia chindee ña'a. ⁵ Io-n ka xani ini xa nani kuu ñn kiu dani kuu ñnka kiu. Te io-n ka xani ini xa dava kiu ii, te io xa kune'e ii-ro. Ñayiu ka xani ini xa ii dava kiu, na kune'e ii-i kiu ijan. ⁶ Ñayiu ka xani ini xa ii dava kiu, io va'a xa xe ii-i chi xaxe'e Ianyuux ka xe ii-i. Ñayiu ka xaxi dava'a nga xa io xa kaxi-ro, io va'a chi ka xani ini-i xa tna ini Ianyuux xa daa ka kida-i, te ka xia'an-i nuu-ia: “N-kuta'u-da, Taa-ro.” Ñayiu ñatu ka xaxi dava'a nga xa io xa kaxi-ro, io va'a chi diuni ka xani ini-i xa tna ini Ianyuux xa ka kida-i, te ka xia'an-i nuu-ia: “N-kuta'u-da, Taa-ro.” ⁷ Ñayo-ro vaxi ñuñayiu xa kada-ro xa ka ku ini mee-ro. Diuni ñayo-ro xantuu kiu kuú-ro. ⁸ Hora xtuu-ro ñuñayiu kida-ro xa juini Ianyuux, te hora n-xee xa kuu-ro ndiyi, yinda'a ña'a na'i-ia. Xndito-ro a n-ka xi'í-ro, dani ka kuu-ro da'ya-ia, ⁹ chi xaxe'e xijan n-xi'í Cristu te n-nandoto-ia. N-xi'í-ia te n-nandoto-ia xa taxnuni-ia nuu ntdaa-ro xa ka kuu-ro da'ya-ia; xndito-ro a n-ka xi'í-ro. ¹⁰ ¿Nakuenda ka jan tnu'u-n dava ñayiu ka kukanu ini-ia? ¿Nakuenda ñatu ka xe ini-n-yi? Ntdaa-ro, io xa ndadandaa Ianyuux kuechi-ro, ma yoo-ro kaku. ¹¹ Du'a yodotnuni: Xandaa xakuiti ndito-r, te xandaa xakuiti ntdanditu'u ñayiu njuiin xiti nuu-r. Te ja'an koio-i xa Ianyuux ndixa kuu-r. Kuu Ianyuux n-ja'an-ia.

¹² Xee kiu ntdaa-ro ja'an nuu Ianyuux nax n-ka xo kida-ro xa n-ka xo tuu-ro ñuñayiu ya'a. Mayo-ro

kaku.

¹³ Maxku jan tnu'u tna'a koio-ro. Na dandoo-ro xijan. Maxku kada-ro ñn xa xani ini ñnka ñayiu xa ñatu kuu xava'a, na kua'a maxku daa kada-i na kua'a maxku kada-i kuechi. ¹⁴ Ka xani ini dava ñayiu xa ñatu va'a xa kaxi-ro dava'a nga xa io xa kaxi-ro, ko xini dañá xa ntdaa xa io xa kaxi-ro, va'a xa kaxi-ro. N-kida Jesucristu xa xini-da xa ñadu kuechi kuu xa kaxi-ro dava'a nga xa io xa kaxi-ro. Daa ja'an dañá, ko nux ndeda-n ka xani ini xa kuechi kuu xa kaxi koio-n dava xa ka xaxi ñnka ñayiu, maxku kaxi koio-n nudaa. ¹⁵ Nux ñn xa ka xaxi-n kida xa kida ñanitna'a-n kuechi, te nux dani na ku kaxi na'i-n ña tuu nax vi'i-n-yi. Maxku dandoo ñn ñanitna'a-n Cristu xaxe'e ñn xa ka xaxi-n chi diuni n-xi'í-ia xaxe'e-i. ¹⁶ Maxku daa kada-n na ña'a jan tnu'u ñayiu ñatu kukanu ini Cristu Ianyuux. ¹⁷ Hora xian tnu'u-da ñayiu nax io xa kada-i xa kiu tna'a-i nuu roo xa ka kuu-ro ñayiu jandixa xa taxnuni Ianyuux nuu-ro, ñatu kakune'e-da xa kaxi xa ko'o-ro. Xa ka kakune'e-da kuu xa io xa jandixa koio-ro-ia. Diuni ka kakune'e-da xa n-ndumani Ianyuux xi'in-ro. Ka kudi ini ñayiu n-kiu tna'a nuu roo xa ka kuu-ro ñayiu jandixa xa taxnuni-ia nuu-ro. Ka kudi ini-i chi ñu'u ña'a Espíritu-ia. ¹⁸ Ñayiu jandixa-ia, ka xinokuechi-i nuu Cristu, te tna ini Ianyuux xa daa ka kida-i. Xndaxio ñayiu xañu'u nuu ñayiu daa ka kida. ¹⁹ Na nduku-ro mudu kutuu mani-ro xi'in ñayiu. Na chindee tna'a-ro xa na kua'a na kutnuni va'a ka ini-ro nax kuu xa juini Ianyuux. ²⁰ Maxku kuu xa ka xaxi ka xi'i-ro kada xa kada ñayiu n-dakua'a-n ñn xa maxku kada-i. Ntdaa xa io xa kaxi xa ko'o-ro va'a, ko nux ndeda ñn xijan kada

xa kada ñayiu kukanu ini Cristu kuechi, ñatu io va'a xa kaxi-ro ntdaa xijan. ²¹ Va'a ka nuu maxku kaxi-ro kuñu, ni maxku ko'o-ro vinu, ni maxku kada-ro inka xa xani ini inka ñayiu kukanu ini Cristu xa kuechi kuu. Va'a ka nuu maxku kada-ro xijan nux xaxe'e xijan kada-i kuechi. ²² Ñayiu xani ini xa xandaa xakuiti io va'a ñin xa kida-i, mee dii nga-i xi'in Ianyuux na'a. Naka ta'u ñayiu ña tuu nax kida xa kune ini-i. ²³ Ñayiu kaa uu kaa uni anu hora ka xaxi-i ñin xa ka xaxi-i xaxe'e xa ñatu io ndaa io kuiti anu-i, kida-i kuechi. Ki'na nuu io xa kani ini-ro nux io va'a xa kada-ro ñin xa kada-ro. Ñayiu kaa uu kaa uni anu hora ka kida-i ñin xa ka kida-i, ka kida-i kuechi xaxe'e xa ñatu io ndaa io kuiti anu-i.

15

Na kada-ro xa tna ini ñayiu ka kuu ñanitna'a-ro

¹ Roo, ñayiu ka xani ini xa xandaa xakuiti io va'a xa kida-ro ñin xa ka xko kida-ro, nux ka xani ini inka ñayiu xa kuechi kuu xijan, maxku kada ka-ro xijan na kua'a maxku daa kada inka ñayiu, te kune ini-i xa daa kada-i, chi ka xani ini-i xa kuechi kuu xijan. Maxku kada-ro xa tna ini ni mee-ro. ² Na jun ini-ro xa kada-ro xa tna ini ñayiu ka kuu ñanitna'a-ro xa kada-ro na kua'a na nduu koio-i ñayiu va'a ka. Na kada-ro xa na kutnuni va'a ka ini-i nax kuu xa n-ja'an Ianyuux. ³ Daa na kada-ro chi Cristu, naa xa kada-ia xa n-ku ini mee-ia n-xejoon-ia xa ya'a-ia na n-ja'an ñin se n-chidotnuni xa n-ja'an Ianyuux. Du'a n-ja'an-s nuu Ianyuux: “Ñayiu n-ka jan kui'a ña'a ndixi n-ka jan kui'a ña'a dañá. Ñayiu kui'a n-ka ja'an

ña'a mee-n kui'a n-ka ja'an ña'a dañá.” ⁴ Dava'a nga tnu'u Ianyuux yodotnuni xa daa nga n-xe kodotnuni xa na ka'u ñayiu, te kutu'a va'a-i xa yodotnuni. Xaxe'e xa ka tu'a va'a-ro xa yodotnuni jan ndikiu ndiñuu xñu ini-ro xa nanita'u-ro, te ña tuu nax ku ini-ro hora nda'u ya'a-ro. Tnu'u yodotnuni jan kida xa kuka'nu anu-ro. ⁵ Kida Ianyuux xa dani ñu ini-ro xa ndixi Cristu Jesús, te xndetu kanu ini-ro. Diuni kida-ia xa kuka'nu anu-ro. Mee-ia na kada xa inuu na kani ini koio-n na xani ini Cristu Jesús ⁶ na kua'a inuu kani ini koio-n hora najuen tnu'u koio-n Taa-ro Ianyuux. Kuu-ia Taa Jesucristu, Ia kuu Xto'o-ro.

⁷ Nani kuva'a anu Cristu nuu koio-n, dani io xa ku kuva'a anu-n nuu dava ka ñayiu kukanu ini-ia xee ve'e-n. Nduka'nu Ianyuux hora na kada koio-n xijan. Tna ini-ia xijan. ⁸ Daa io xa kada koio-n chi n-xinokuechi Cristu nuu ñayiu Israel xa na jin tna'a xa n-ja'an Ianyuux nuu uxi uu da'ya yi Israel, chi xa daa nga n-ja'an Ianyuux xa kada-ia in xa kada-ia da'ya dana-s. ⁹ N-xetna'a xa n-ja'an-ia xa kada-ia xa na kua'a ndadaka'nu ñayiu ñatu ka kuu ñayiu Israel-ia. Ka ndadaka'nu-i-ia xaxe'e xa kunda'u ini-ia-i. Du'a yodotnuni xa n-ja'an in se n-ja'an nuu Ianyuux:

Juña'a-da nuu ñayiu ñatu kuu ñayiu Israel xa kuu-n Ianyuux.

Nakuetu-da nuu-n.

Kata-da Salmos.

¹⁰ Diuni yodotnuni xa n-ja'an inka se n-ja'an:

Ndixi, ñayiu ñatu ka kuu ñayiu Israel, io xa kuvete koio-n xi'in ñayiu ka kuu da'ya Ianyuux.

¹¹ Du'a yodotnuni inka ntuku nuu yodotnuni:

Io xa najuen tnu'u ndixi, xa ka kuu-n ñayiu ñatu ka kuu ñayiu Israel Ianyuux.

Na nakuetu ntdaa ñuu ñuñayiu nuu-ia.

¹² Te diuni n-chidotnuni se n-xo nani Isaías:

Ïn se kuu da'ya dana Isaí taxnuni,

chi n-taxnuni xixitna-s.

Taxnuni-s nuu ñayiu ñatu ka kuu ñayiu Israel.

Kukanu ini ña'a ñayiu xa kada-s xa n-ja'an Ianyuux xa kada-s.

¹³ Ianyuux, kuu-ia Ia kida xa ñatu xe tñi ini-ro xa ya'a xa xñu ini-ro xa ya'a. Na kada-ia xa kuvete koio-n xaxe'e xa kukanu ini-n-ia, te diuni na kada-ia xa maxku kune ini ka-n xaxe'e kuechi n-ka kida-n chi ndumani-ia xi'in-n xaxe'e xa kukanu ini-n-ia. Nux daa na xee kuu, kada Espíritu-ia xa ma natu ini-n xa kukanu ini-n-ia, ni ma jin tñi anu-n xa kukanu ini ka-n-ia.

¹⁴ Xini-da xa ka ka'u-n tnu'u Ianyuux yodotnuni, te va'a ka tu'a-n. Diuni xini-da xa va'a ka dakua'a tna'a-n. Xaxe'e xijan xini-da xa xandaa xakuiti yo unu va'a-n. ¹⁵ Xa nadaja'an ña'a ntuku-da xa kada-n xa n-ja'an-da ya, n-chidotnuni-da ntdaa tnu'u ya'a. N-kuyi-da xa n-chidotnuni-da xa'a. Nadaja'an ña'a-da xijan xaxe'e xa n-tetutniu ña'a Ianyuux ¹⁶ xa dakua'a-da ñayiu ñatu kuu da'ya dana Israel. Mudu ya'a xinokuechi-da nuu Cristu Jesús. Ja'an-da nuu ñayiu nax io xa kada-i xa nanita'u-i. Kuenda kiu dutu kuu-da, te kuenda kiu ñn xa n-ka doko dutu nuu altar te nakueka Ianyuux ka kuu ñayiu dakua'a-da. Ïn xa tna ini Ianyuux ka nduu-i chi n-kida Espíritu-ia xa n-ka nduu-i ñayiu ii. ¹⁷ Xaxe'e xa kunduu-da xi'in Cristu Jesús, najuen tnu'u-da mee-da hora kakune'e-da ñayiu ndeka Ianyuux. Ndeka-ia-i

xaxe'e xa dakua'a-da-i. ¹⁸⁻¹⁹ Ñadu mee ni-da n-kida xa n-kida-da chi Cristu n-kida xa n-ndaku-da xa n-kida-da xijan. N-kida-ia xa ndaku-da xa ja'an-da xa n-ja'an Ianyuux nuu ñayiu. Dɨuni n-chindee ña'a-ia xa n-kida-da xava'a, te n-ka xo nde'a ñayiu. N-kida Espíritu Ianyuux xa titni vuelta n-kida-da milagru. Xaxe'e ntdaa xijan jandixa ñayiu ñatu ka kuu da'ya dana Israel Ianyuux. N-ja'an-da nuu ñayiu Jerusalén xi'in ntaka ñuu n-ka nadukundu Jerusalén xa na kukanu ini-i Cristu na kua'a nanita'u-i. Nde Jerusalén xi'in nde nuu nani Iliria n-ja'an-da xijan. N-kida-da ntdaa tniu n-taxi Ianyuux. ²⁰ N-xe'en-da nuu ñayo n-xo xini jundu kuu Cristu. Xijan ñu ini-da xa kada-da chi ñatu n-kuu anu-da xa ji'in-da nuu xá n-ka kixe'e inka ñayiu xa ja'an-i xijan. ²¹ Nakaxtna'a xa'a xi'in xa yodotnuni. Du'a yodotnuni:

Ñayiu ta jini ka xa n-kida-s, jini-i xijan vitna.

Ñayiu ta teku ka xa n-kida-s, teku-i xijan.

Te jini koio-i nax kuu xijan.

Ku ini Spalu xa kajanta'u ñayiu Roma xaxe'e-s

²² Xaxe'e xa'a ña kuu xa xe kotoni'ni ña'a-da, ²³ ko vitna ñatuka tniu n-taxi Ianyuux io ya'a xa kada-da. Xá n-kuu kuia daa nga kuu anu-da xa xe kotoni'ni ña'a-da. ²⁴ Ji'in-da España, te ichi dian kotoni'ni ña'a-da. Hora na xee-da xa kutuu-ro, yo kudi ini-da. Jun ini-da xa janu ichi ña'a koio-n xa ji'in-da España. ²⁵ Ki'na ka ji'in ntuku-da Jerusalén xa dakexio-da xa ndoñu'u ñayiu n-kida Ianyuux xa n-ka nduu ii-i xtuu ijan. Ijan dada xee-da dian ²⁶ chi xndaxio anu dava ñayiu Macedonia xi'in Acaya xa juña'a nga-i xa ka ndoñu'u ñayiu

Jerusalén n-kida-ia xa n-ka nduu-i ñayiu ii. ²⁷ Io anu ñayiu Macedonia xi'in ñayiu Acaya xa daa kada-i. Io xa daa kada-i ñayiu Jerusalén xaxe'e xa ñayiu Israel ka kukanu ini Jesucristu n-kida xa n-ka tekú ñayiu Acaya tnu'u-ia. Kidayika-i xa juña'a koio nga-í tvini xa chindee-i ñayiu Jerusalén. ²⁸ Na ya'a xa dakexio ndi'i-da tvini n-ka taxi ñayiu Acaya xi'in Macedonia yinda'a-da, te ngondita-da xa xee-da dian. Ijan dada ya'a-da xa ji'in-da España. ²⁹ Xa na'a-da xa xandaa xakuiti juini Cristu xa xee-da dian.

³⁰ Xijan ta'u-da nuu-n xa na kajan ta'u koio-n xi'in nde yiki nde tuchi-n nuu Ianyuux xa na chindee ña'a-ia dañá. Nani xko xijan ta'u-da nuu-i, dani xijan ta'u koio-n nuu-ia. N-kida Jesucristu, Ia kuu Xto'o-ro, xa ta'u tniú-da nuu-n xa kajan ta'u-n nuu Ianyuux xa na chindee ña'a-ia. Xaxe'e xa n-kida Espíritu Ianyuux xa xemani ña'a-n, kajan ta'u-n nuu-ia xa na chindee ña'a-ia. ³¹ Kajan ta'u koio-n xa na kaku-da nuu ñayiu ña ka kukanu ini Jesucristu xndaxio Judea. Diuni kajan ta'u koio-n xa na xe ini koio ñayiu n-kida Ianyuux xa n-ka nduu-i ñayiu ii xndaxio Jerusalén xa juña'a-da. ³² Diuni kajan ta'u koio-n xa na kudi ini-ro hora na xee-da dian te ndetatu-da nux na kachi Ianyuux. ³³ Na kunduu koio-n xi'in Ianyuux. N-ndumani-ia xi'in-ro. Amén.

16

Ndajan tnu'u Spalu ñayiu ka kukanu ini Jesucristu xndaxio Roma

¹ Juini-da xa ku ku ini va'a koio-n nuu Febe, ñin ña kukanu ini Jesucristu hora na xee-ña dian. Ñnuu

Cencrea netniu-ña xa xinokuechi-ña nuu ñayiu ka kukanu ini Jesucristu. ² Juini-da xa ku ku ini va'a koio-n nuu-ña ná ka ku ini va'a-ro nuu ntdaa ñayiu n-kida Ianyuux xa n-ka nduu-i ñayiu ii. Juña'a koio-n xa na ndoñu'u-ña, chi yo kue'e ñayiu n-kuu chindee-ña vaxi; nde dañá xko chindee-ña.

³ Yo ndajan tnu'u-da Priscila xi'in Áquila, ñayiu ka kida xi'in-da tniu Cristu Jesús. ⁴ Diko nga xa kuú koio-ña xaxe'e-da. Na kuta'u-da. Ñadu mee ni-da kuu ñayiu ja'an xa n-kuta'u-da xa n-ka kida ña'a-ña xava'a chi diuni ka ja'an ñayiu ka kukanu ini Jesucristu ñatu ka kuu da'ya dana Israel xa n-kuta'u-i xa daa n-ka kida-ña-i. ⁵ Diuni ndajan tnu'u-da ñayiu ka kukanu ini Cristu Jesús ka nataka ve'e-ña xa ndadaka'nu-i-ia. Diuni ndajan tnu'u-da Epeneto, se mani xi'in-da. Diu-s kuu se Asia n-kukanu ini Cristu Jesús ki'na nuu. ⁶ Diuni ndajan tnu'u-da María. Yo vichi n-kidatniu-ña xaxe'e-n. ⁷ Ndajan tnu'u-da Andrónico xi'in Junias. Ñayiu ñuu-da ka kuu-s nduu-s. N-ka yindi'u-s kiu n-yindi'u-da. Ndandi'i-s nduu-s nuu se n-tunda'a Cristu Jesús xa dakua'a koio-s ñayiu. Ki'na ka se ya'a n-ka kixe'e xa kukanu ini-s Cristu dada dañá. ⁸ Ndajan tnu'u-da Ampliato, se mani xi'in-da xaxe'e Cristu tuku. ⁹ Ndajan tnu'u-da Urbano. N-ka kida-da tniu Cristu xi'in-s. Ndajan tnu'u-da Estaquis, se mani xi'in-da tuku. ¹⁰ Ndajan tnu'u-da Apeles. Nda'u n-ya'a-s xaxe'e Cristu, ko kukanu ini na'i-s-ia. Ndajan tnu'u-da ñayiu xtuu ka'nu xi'in Aristóbulo. ¹¹ Ndajan tnu'u-da Herodión, tna'a-da kuu-s. Ndajan tnu'u-da ñayiu kuu familia Narciso ka kukanu ini Cristu, Ia kuu Xto'o-ro.

¹² Ndajan tnu'u-da Trifena xi'in Trifosa. Yo vichi n-ka kidatniyu-ña xaxe'e Cristu, Ia kuu Xto'o-ro. Ndajan tnu'u-da Pérsida. Diuni mani-da xi'in-ña. Dani mee-ña, yo vichi n-kidatniyu-ña xaxe'e Cristu, Ia kuu Xto'o-ro. ¹³ Ndajan tnu'u-da Rufo, se n-kaxi ña'a Cristu, Ia kuu Xto'o-ro, xa ku kuu-s da'ya-ia tuku. Diuni ndajan tnu'u-da di'i-s. Kuenda kiú di'i-da kuu-ña. ¹⁴ Ndajan tnu'u-da Asíncrito, Fle-gonte, Hermes, Patrobas, Hermas xi'in familia-s ñn ñn-s xa ka kuu-i ñayiu ka kukanu ini Cristu. ¹⁵ Ndajan tnu'u-da Filólogo, Julia, Nereo xi'in ku'a-s xi'in Olimpás xi'in familia-s ñn ñn-s xa ka kuu-i ñayiu ka kukanu ini Cristu. N-kida Ianyuux xa n-ka nduu-i ñayiu ii. ¹⁶ Juña'a tna'a-n xanyuux, te teyu'u tna'a-n ná ka kida dava ka ñayiu ka kukanu ini Cristu. Ndajan tnu'u ña'a dava ka ñayiu ka kukanu ini Cristu xtuu ya'a.

¹⁷ Ta'u tniyu-da nuu-n xa koo koio-n cuedado nuu ñayiu ka kida xa ma inuu ka kani ini koio-n. Daka ni'no ña'a-i xa maxku jandixa ka-n ntaka xa n-ja'an Cristu. Xa ka xini-n xa xandaa kuu xa n-ja'an-ia. Maxku kandeka tna'a ka-n xi'in ñayiu ijan. ¹⁸ Hora dakua'a-i ñayiu, ñadu nuu Cristu, Ia kuu Xto'o-ro ka xinokuechi-i chi xa kuu ini mee-i ka kida-i. Ka ja'an-i xa ka kukajan ini mee-i xa kada-i. Ka danda'u-i ñayiu lilu chi yo vii ja'an-i, te ka xani ini ñayiu jan xa va'a ka tu'a-i. ¹⁹ Kue'e ñayiu kue'e ñuu n-ka tekú xa va'a jandixa-n Cristu. Xaxe'e xijan kudi ini-da. Jun ini-n xa kaan-n xa kada-n mee ni xava'a, ñadu xa daa xaloko ka ku kada koio-n. ²⁰ Na kada Ianyuux, Ia kida xa xtuu mani ñayiu xa na ndaku-n nuu Kui'na nuu xaku tiempo. Na chindee chituu ña'a Jesús, Ia kuu

Xto'o-ro.

²¹ Ndajan tnu'u ña'a Timoteo, se kida xi'in-da tniu Cristu. Diuni ka ndajan tnu'u ña'a se nani Lucio xi'in se nani Jasón xi'in se nani Sosípater. Diuni tna'a-da ka kuu-s.

²² Daña Tercio, se chidotnuni tnu'u Spalu, diuni ndajan tnu'u ña'a-da chi ntdaa-ro ka kukanu ini Cristu, Ia taxnuni nuu-ro.

²³⁻²⁴ Diuni ndajan tnu'u ña'a se nani Gayo xi'in dava ka ñayiu ka kukanu ini Cristu. N-xeka ña'a Gayo daña nukée nuve'e-s. Ndajan tnu'u ña'a se nani Erasto, se yinda'a tvini ñuu ya'a. Diuni ndajan tnu'u ña'a se nani Cuarto.

²⁵ Kida Ianyuux xa kutnuni ka ini-n jua'an xa n-xe kodotnuni ya. Yodotnuni xa io xa kukanu ini ñayiu Jesucristu na kua'a nanita'u-i. Xa'a kuu xa ka ja'an-da nuu-n xi'in dava ka ñayiu. Kachitnu'u ña'a-da xa n-datuu Ianyuux vitna. Nde na ta nkavatuu ka ñuñayiu, xa daa nga na'a-ia xijan. ²⁶ Ñayo ñayiu n-ka xini xijan xaki'na. N-ta'u tniu Ianyuux xa n-ka chidotnuni se n-ka ja'an nuu ñayiu xa n-ja'an-ia xa xijan ya'a xa na kua'a na jini-n ntdaa-n xijan vitna na kua'a kukanu ini-n Cristu, te jandixa-n Ianyuux. Xa'a kuu xa n-kachitnu'u ña'a Ianyuux. ²⁷ Na najuen tnu'u-ro Ianyuux. Mee dii-ia tu'a ka. Ñayo xee-ia. Na chindee ña'a Jesucristu xa na ku ndadaka'nu-ro Ianyuux nikava nikuita. ¡Amén!

Tnu'u va'a tnu'u Jesucristo
New Testament in Mixtec, Diuxi-tilantongo
(MX:xtd:Mixtec, Diuxi-tilantongo)

copyright © 2001 Wycliffe Bible Translators, Inc.

Language: Mixtec, Diuxi-tilantongo

Translation by: Wycliffe Bible Translators, Inc.

Mixteco, Diuxi y Tilantongo [xtd], Mexico

Copyright Information

© 2001, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Diuxi-tilantongo

© 2001, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

601f9a87-70f6-56f7-8175-fc2dac9c9f9a